



天津交通銀行同人俱樂部圖書室

左文襄公奏稿卷五十五

起光緒五年巳卯八月訖十一月

目錄

請 敕催各省關趕解協餉摺

覆陳邊務摺

逆酋窺邊官軍防剿情形摺

覆陳喀什噶爾驅逐俄民各節片

賊酋糾眾犯邊進剿大勝懇 獎卹出力陣亡各員弁摺

南疆肅清案內擬保各員官階請作為底銜片

請 敕令劉錦棠幫辦新疆軍務片

覆陳交收伊犁事宜摺

奏稿卷五十五目錄

覆陳李鴻章所奏各節摺

被議總兵劉楚華請暫緩赴戍畱防效力摺

覆陳革員殺斃旌善營弁丁一案摺

光緒元年正月初一日起至三年十二月底止軍需款目報

銷摺


同治十三年分軍需用款請 敕部照前單核銷片

監禁阿古柏子孫片

新疆蕩平出力員弁彙案請 獎摺

各省關籌解協餉各員併案請 獎摺

蔭生楊宗瑞請以同知分發陝西補用片



革員祝應燾懇

恩註銷永不敘用并

賞給原銜頂帶片

奏稿卷五十五目錄

請

敕催各省關趕解協餉摺

光緒五年八月初四日會幫辦甘肅新疆善後事宜楊昌濬銜

奏爲

臣軍存餉將罄亟籌接濟請

旨敕催各省關將應協西征新餉提前趕解以濟要需俾免籌借商款致耗重息恭摺馳陳仰祈

聖鑒事竊臣軍餉項上年奏蒙

天恩准借華款銀三百五十萬兩今春陸續撥解到甘半年以來藉資支展惟關內外征防各軍月需薪糧及陸續裁汰弁勇清釐欠餉款目甚鉅新疆甫經收復籌辦一切善後事宜需費又急卽後路各臺局採買轉運經費亦屬不資兼代河南山西墊發張曜金運昌兩軍餉糧運費而金順恭鏗長順每因專餉未到亦時向

奏稿卷五十五

一

臣挪借又不能不通融挹注共濟時艱本年各省關應協西征軍餉截至六月底止連聞七箇月應協十成銀四百四十一萬餘兩除已解銀二百七萬餘兩外實欠解銀二百三十四萬餘兩卽各省已經報解之二百七萬餘兩內除劃還華商兩款銀一百一十餘萬兩外其實在轉解來甘者尙不及一百萬兩計上年至今關外楚湘蜀皖各軍陸續裁撤歸併者約已減去九營關內隨時裁撤歸併者約在十營以外此外因存餉無多未能再議裁併見在各省關續解之餉既屬寥寥而前借華款業經告罄若再向華商續籌息借未免耗費鉅款臣等往復函商通盤籌算秋冬之交非大批協餉解足難資周轉檢查各省關協餉數目除山東已提前

解至六年六月分山西見應停緩不計外其餘廣東福建浙江江西江蘇安徽湖北湖南河南四川閩海粵海江漢各省關欠解甚多應請

旨敕下督撫將軍臣欽遵光緒四年十二月十五日欽奉

諭旨各該省應協左宗棠月餉自光緒五年起三年內均按十成數日報解俾資應用等因提前趕解大批協餉務於年內一併到營庶資接濟如省關協餉仍不能以速補遲則臣等無法可施勢不得不就湖北陝西向華商續籌息借以措時局而息耗一項將來無款抵補又成積欠之根臣等再四籌維實有難以措置者除將各省關欠餉數目開單咨部外謹專摺馳陳伏乞

奏稿卷五十五

二

皇太后

皇上聖鑒訓示施行謹 奏

軍機大臣奉

旨著戶部查照左宗棠等咨行單內所開各省關欠餉數目迅速咨催務令提前趕解大批於年內解到該營以濟急需欽此

覆陳邊務摺

光緒五年八月十一日

奏爲遵

旨覆陳仰祈

聖鑒事竊臣於六月十七日欽奉

諭旨總理各國事務衙門奏接據出使俄國大臣電報并密陳交收伊犁一事各摺片據奏崇厚電報內稱俄國接金順復文俟交收伊犁後方可弛禁俄人所爭俟弛禁後方可交收伊犁見擬辦法請卽行文邊界弛禁通商等語俄人久據伊犁此次雖允交還其欲藉此要挾圖佔便宜固在意中然利害所關必當權其輕重未可因急於索還伊犁轉貽後患卽如通商一節所該地方甚廣

奏稿卷五十五

三

流弊滋多分界一節欲於原估界址外再圖侵佔卽償款一節雖據布策云并無因利多索之心然數目究未明言以上三端均尙未有成議若遽行弛禁彼又得步進步多所要求辦理轉致棘手崇厚務當力持定見總宜將通商分界償款三端議定後與交收伊犁同時并舉方爲妥善設或所議各節利害相權得不償失自應另籌辦法著崇厚左宗棠金順錫綸詳細陳奏至崇厚電信所稱喀什噶爾寄居俄國屬民驅逐出境及和闐有亂住俄回民欲入喀什噶爾滋事各節是否確有其事著左宗棠查明具奏欽此跪聆之下敬仰我

皇上洞鑒幾先無遠弗照俾使臣得有遵循不致遷延游移致貽

後患比卽恭錄

諭旨密致金順錫綸擬俟商定一切會同陳覆因彼此相距甚遠覆到需時恐塵

聖慮謹先就管窺所及敬爲我

皇上陳之竊維伊犁本我舊土適中原多故遠略未遑猝致淪陷俄人伺釁而動藉詞代爲收復入踞要區亦知所爲本冒不韙佯言俟官軍克復烏魯木齊瑪納斯卽交還伊犁更無異說迨

天戈西指迅克烏魯木齊瑪納斯而俄踞伊犁自若也官軍踰嶺而南拔吐魯番連下八城安集延逆酋旣伏其鼻逆豎與陝甘敗殘逆賊渠目白彥虎等竄入俄境俄官納之屢索不與而踞伊犁自若冬春之交竄俄諸逆領取俄邊貿易路票三次窺邊爲官軍搜獲俄官諉爲不知而踞伊犁自若

朝廷重念邦交

特命崇厚出使以修約而敦睦誼於交還伊犁外并議及界務與商務夫伊犁應還不待今日且俄人舊議也今遲之又久始踐前諾其未足市德於我也明矣以界務論同治三年明誼與俄官定議準之舊界有縮無贏此次卽仿甌脫往事視爲隙地彼此共之在我仍有所損在彼亦受其益以商務論除邊界舊約無庸更議外布策從前在京師雖頗以嘉峪關爲意總理衙門未嘗輕許自不得卽據爲定論此次崇厚議允其設立領事已過所望凡此皆

不待煩言而決者崇厚以全權出使仰體

皇仁商務界務外更有議及償款之請彼既利我土地我復許以重酬於義雖似未協然漢文之待北匈奴大單于也詔書而外優以繪帛詞意斐亶故事可循猶之可也

皇仁俯允所請惟於商務慮其流弊滋多界務慮其再圖侵佔

敕崇厚堅持定見崇厚欽遵

諭旨與俄之外部諸臣從長計議理足而將之以誠我睦鄰之誼盡而又盡彼饜足之道加無可加若界務於同治三年定議外再許侵佔商務於嘉峪關內再允推廣則有關

國家疆圉華民生計者甚大在拮据戎馬機會迫促時猶未可輕

議及此矧值

奏稿卷五十五

五

天威遠被遐邇震懾何爲必出此下策以苟且目前竊恐俄人識時務者或疑過情之許爲不誠其無知者翻疑我情實之兩誑有爲而無爲之論端日出應接不暇固無論犒糠及米異時防不勝防必將於大局有誤也臣愚竊謂伊犁塔爾巴哈臺一帶舊界已難復按則仍以同治三年所定之界爲定而以舊界作爲甌脫隙地俄人或有在隙地內造屋居住一時難於遷徙者亦姑聽之但定爲甌脫隙地禁其日後修造可也所有哈薩克各部落之舊屬中國新附俄國者一併劃明界址毋俾混雜其喀什噶爾英吉沙爾一帶舊設卡倫爲逆酋阿古柏所毀逆於相距二百里內外改

設卡倫查本安集延故地此次用兵追賊所得因移舊卡於此地雖在舊界之外與俄無涉不在議內此界務大略也至商務已允其嘉峪關設領事通商其由俄邊而來入中國境如古城巴里坤哈密安西玉門等處地方皆其必出之途由古城經過者有官有驛足資照料惟旁境可通車駝者尙多應分設塘汛容俟察核辦理嘉峪關城地極褊狹俄設領事於此勢多不便或於肅州城內外度地居之地之相距僅六十里亦易照料由官置地建造租賃俄官居住按月薄取佃值并無不合俄之官商不得私向民間購基造屋致滋論端此商務大略也至由肅州高臺經甘涼兩郡以達蘭州省會由蘭州南路以達漢中或由東路達陝西省會由西

奏稿卷五十五

六

安以達漢中而均指漢口爲銷貨置貨之地由俄邊至漢口水陸萬里而遙歷新疆甘肅陝西河南湖北轄境陸程居其大半至龍駒寨荆紫關各處始有小船可雇餘皆車駝曳負以行道途修阻途徑錯雜俄商零星裝運防護難周時有疏失之慮如其聯幫行走尖站過載主客相參易滋口舌俄商性情高傲計較最工內地無賴之徒從而簸弄事事倚藉外人聲勢構釁生端官司不能讞禁偶有抵觸輒干吏議各省大吏相距太遠聲息難通事關中外交涉咨行察辦往復需時兩造各執一詞難於究詰案懸莫結動經數年督責既有時而窮調停復無計可設而疏漏冒混獄市多擾姑不具論此患之中於官者也甘肅地瘠民貧向不知經商服

賈之利土物行銷外省者於葉藥材而外別無大宗民間所用車輛多係無鐵高輪牛馬駕曳負重而不能行遠馱貨用驢於農隙受雇運貨以供餵養而資其餘利陝西駕車多用騾馬惟馱用騾騾產自河南嵩洛間非陝所出陝民以車馱爲業者購騾於豫攬載通行百貨藉以運銷公私均取給於此軍興日久牲畜疲乏倒斃爲數既多加以陝豫游饑民間因餒養缺乏宰食充腹者不少於是車馱之價頓增百貨轉運因之而滯民間以私蓄車馱牛驢於農隙短運取值以資過度若允俄商入內銷貨置貨則車馱雇價益昂民間短運將廢生機頓塞殊非所宜此患之中於農者也商貨行銷茶爲大宗茶之所產以楚爲盛甘肅舊有茶商行銷之

奏稿卷五十五

七

茶設有官引從前私茶充斥官引不行軍興以來官商死喪流亡茶務倒歇臣不得已奏請改引爲票招販承銷裁革陋規聽民自便於是茶販踵至迨官軍復地漸廣可冀暢銷而私茶又由山西包頭藉行銷蒙古繞道草地侵銷新疆北路間有倒灌南疆者臣飭古城巴里坤印委各員實力查禁而偷越仍難杜絕惟南疆吐魯番八城纏回見塲茶則喜謂卽承平時湖茶非私販筒子茶可比惟地方新復銷數尙未能暢計官茶屯滯各處者尙百餘萬斤非一兩年不能銷盡而票販成本息耗愈久則虧累愈鉅正思減價出售以清夙累若允俄商入內地置貨勢必侵佔官茶引地票販虧累無從取償此患之中於商者也經商之事必先計成本所

謂成本者合貨價運腳盤攬三者估之攤入貨色爲成本再計市
值之高低爲利息之贏縮大抵皆然泰西各國之通商者均由海
道入長江抵漢口雖遠逾數萬里而皆一水可通貨價雖同而運
腳較陸程減少不止十倍洋商初入長江見漢口爲百貨匯萃埠
頭爭於其地購地修造洋行又於漢口下游江西之九江購地如
式修造洋行旣成傑構臨江自誇得計乃不數年生計蕭條得不
償失并兩處洋行覓主求售亦不可得水路經商尙如此之艱也
茲俄商不顧崎嶇萬里欲與海國競此貿易之利前車旣覆後轍
方適加以陸運腳價行棧盤攬合計成本較各國商人奚翅十倍
過之縱使善於營運折閱固在意中雖彼自失算於我無尤然折

奏稿卷五十五

八

閱必不甘心又將顧而之他爲求贏之計於是而電綫鐵路諸事
議論紛紜殆有應接不暇者斯時偶與通融異日卽添無數煩惱
再圖補救悔之已遲此患之中於

國計者也臣愚再四籌維俄商若由嘉峪關歷甘肅陝西河南湖
北而抵漢口銷貨置貨彼此實無利益徒多擾累非賴使臣欽遵

諭旨堅持定見剴切言之俾決計阻止不可至洋藥流毒日久必
思所以禁之論其辦法次第必自內地禁種罌粟始內地不產菸
則其價必昂價昂則吸之者自少然後禁令可張始有更新之望
甘省遵

旨禁種罌粟著有成效上年曾經奏明見復據司道詳稱先後據

府廳州縣稟報印委各員躬親巡歷不憚勞苦民間奉令惟謹實已根株淨絕惟懇出示曉諭禁止外來土菸如有川滇客民販土入境者當眾焚燒薄與責懲令其改圖貿易奸販亦漸知聳懼臣擬俟覆核確實再行具奏茲閱崇厚商改章程第十五款於洋藥定議稍寬其禁准在口銷賣殊與甘肅見行章程不合若照所議不特無以慰此邦官紳士民望治之心亦無以杜川滇商販之口崇厚未悉見時甘肅辦法故有此議可否仰懇

皇上天恩諭將洋藥一項芟除定議伏候

聖裁猶憶光緒元年俄使索思諾福斯齊等在蘭州與臣談及將來通商事宜卽言斷不令俄商販鴉片入中國似洋藥流毒爲中

奏稿卷五十五

九

國所不容亦俄人所共知也

諭旨垂詢崇厚電信所稱喀什噶爾寄居俄國屬民驅逐出境及和闐有亂住俄回民欲入喀什噶爾滋事各節是否確有其事臣

已恭錄移知金順劉錦棠矣惟新疆南路文報絡繹從無隻字道及未知崇厚果何所聞或俄人意欲釋其前此縱賊犯邊之嫌則未可知近接道員羅長祐函稱英國駐土耳其領事有來喀什噶爾會晤之意措詞甚恭又稱今正大捷漏逸賊酋愛克木汗條勒阿布都勒哈瑪因俄人不肯收納寄居烏魯克恰提近甫渡河而南招致回部游手意在窺邊羅長祐已調馬步兩旂赴烏帕爾築壘以待餘均照常安謐合併附陳仰祈

皇太后

皇上聖鑒訓示謹 奏

軍機大臣字寄光緒五年八月二十四日奉

上諭昨因總理各國事務衙門奏崇厚與俄國商辦交收伊犁事宜輕率定議畫押當經諭令左宗棠等籌畫密奏本日據左宗棠奏覆陳邊務一摺所陳界務商務大略及防民病國各條慮遠思深洵屬老成之見特崇厚見已定議畫押事機已誤惟有亟籌補救設法挽回著左宗棠懍遵昨日諭旨將商務界務如何辦理始臻周妥之處或約章必不可允邊防一節如何布置始無患生肘腋之虞詳細籌度妥議具奏前據編修高萬鵬奏秦隴等處聞有

奏稿卷五十五

十

土於入境嚴拏焚燒之事請暫罷此令以弭釁端會諭該督酌辦此次左宗棠摺內所稱甘境禁種罌粟根株淨盡見擬出示禁止外來土菸如有川滇客民販土入境者當眾焚燒薄與責懲等語是高萬鵬所奏事非無因仍著左宗棠體察情形妥籌辦理將此由五百里諭令知之欽此

逆酋窺邊官軍防剿情形摺

光緒五年九月初三日

奏爲漏逸逆酋糾眾窺邊見籌防剿情形恭摺馳陳仰祈

聖鑒事竊喀什噶爾今正大捷逆酋愛克木汗條勒阿布都勒哈瑪與敗殘餘眾數千人竄遁俄境阿來地方五月內被俄官驅逐該逆酋等因俄不見容遂由阿來竄出越愛克什塔木俄國邊卡踞我外卡之外以跟地方自言無地逃生卑詞懇諸安集延布魯特各回助其竊踞邊城暫延喘息回眾中喜事無賴之徒轉相煽加以誘脅從亂者漸多六月十七日竄至烏魯克恰提嗣後渡河而南招致回部意在窺邊臣接道員羅長祐函告比於八月十一日覆陳摺內附敘及之旋接通政使二等男臣劉錦棠七月十

奏稿卷五十五

七

四日咨報所敘賊情賊蹤與羅長祐無異而布置一切較爲詳明按烏魯克恰提距喀什噶爾約七百里中隔戈壁賊由烏魯克恰提南竄則必出烏帕爾西南竄則必出色勒庫爾以兩地水草均便多產糧料人馬足供故也劉錦棠先派羅長祐率馬步赴烏帕爾修築堅壘副將劉必勝步隊總兵夏辛西馬隊駐守扼之飭西南沿邊各布魯特徙帳內地避賊裹脅劉錦棠按兵喀什噶爾擬伺賊所向急起擊之嗣復接劉錦棠七月二十五日咨報阿布都勒哈瑪由烏魯克恰提翻山而南向色勒庫爾竄走後兩日愛克木汗由烏魯克恰提踰河而南越買勒克蘇明特益等處復向西南竄走是其併趨色勒庫爾圖與阿布都勒哈瑪合股無疑劉

錦棠派羅長祜率步隊三旅畱守喀什噶爾漢城總理後路防守事宜總兵杜錫斌率所部董宇左營步隊駐紮回城并飭提督李克常副將劉必勝等仍常駐紮以重邊防布署已定七月二十六日劉錦棠親率馬步二千有奇由喀什噶爾向色勒庫爾進發沿途如別無戰事計旬日內可到地接仗容俟續報到時再行馳奏竊維新疆北路壤接哈薩克布魯特南疆則與安集延布魯特各部落毗連此次賊竄色勒庫爾地屬葉爾羌邊境在喀什噶爾西南種人雜錯其間最易煽動非迅予殲夷則展轉句結必致重煩兵力劉錦棠料賊所必出之途而急起乘之者以此所幸賊蹤經歷皆山谷崎嶇官軍由卡內追擊道路稍夷如履衽席差爲得算至若新疆地方因俗施治政教未行愚回信奉其汗比條勒已成錮習非革除舊俗漸以華風望其長治久安事有難言者微臣之妄擬改設郡縣亦以此擬俟北路底定再會議請

旨遵行謹將逆酋窺邊官軍馳勦情形據實陳奏伏乞
皇太后

皇上聖鑒訓示施行謹 奏

軍機大臣字寄光緒五年九月十七日奉

上諭左宗棠奏漏逸逆酋糾眾窺邊見籌防勦情形一摺逆酋愛克木汗條勒阿布都勒哈瑪句煽黨眾由烏魯克恰提分竄併趨色勒庫爾劉錦棠已率馬步各隊前往勦辦著左宗棠督飭該京

卿相度機宜奮勇進剿務將此股賊匪剋日殄除毋任句結該處
種人蔓延爲患一面飭令防軍嚴加防範以杜竄擾不得稍有疏
虞至新疆地方愚回錮習未除自應規畫久遠移其風俗俾就範
圍該大臣所擬改設郡縣應如何辦理之處并著妥籌具奏將此
由五百里諭令知之欽此

奏稿卷五十五

覆陳喀什噶爾驅逐俄民各節片

光緒五年九月初三日

再臣欽奉

諭旨崇厚電信所稱喀什噶爾寄居俄國屬民驅逐出境及和闐有亂住俄回民欲入喀什噶爾滋事各節是否確有其事著左宗棠金順查明具奏欽此臣比恭錄咨行劉錦棠查明具覆以憑覆奏茲准劉錦棠覆稱查逆酋阿古柏本安集延人所用各頭目皆其種類卽未充頭目者亦無不倚勢作威相助爲虐西四城克復時除著名首要各逆已經擒斬外餘隨逆豈伯克胡里竄俄其安集延丁口寄居喀什噶爾者約尙數千劉錦棠仰體

皇仁未卽驟加誅戮咨商處置之法臣比答以此輩若與纏回狎

奏稿卷五十五

古

處異時終啟邊釁應詢明願歸安集延者仍放歸故土餘均擇地安插劉錦棠飭各城善後局傳諭照辦其中有願歸故土而已在各城置產者准其估價出售本地人民爲業不准稍有抑勒自上年春間至本年夏季疊經各局陸續放歸甚多其偶有遷延則皆因產業求售無主者也然而未嘗勒限驅遣稍事追促竊查安集延本係浩罕四部之一俄國雖併其三部而安集延人隨阿古柏竊踞回疆未爲俄所兼併固天下所共知茲俄人旣認寄居喀什噶爾之安集延爲所屬之人則安集延之舉動應由其指使何以安集延隨同阿古柏入寇回疆俄國并不加約束乃謂我之寬宥安集延人放其自歸故土并准其出售產業復聽其自歸不加迫

促乃爲驅逐姑弗論竊踞回疆之安集延本非俄屬俄之代抱不平不值一哂我之待安集延人又實法外施仁無可復議也此不可解者也和闐民富而性馴就撫以來地方安堵訟獄亦稀閏三月內有鐵匠咬不拉爲人打造腰刀二十把託商民帶赴退擺特地方發賣居民以形迹可疑告局局員葉自遠以私造軍器事關重大稟知劉錦棠劉錦棠以此案牽引七人慮有冤蔽飭解赴行營訊結尙未據解到縱令私造腰刀實有異志亦焉能爲何煩俄人代爲過慮此不可解者也如謂誤聞浮言卽以見告足表其關念之誠則此次窺邊逆酋由俄邊驅逐而來俄官豈得諉爲不知何獨無一言見告乎再四思維或布策輩因崇厚以誠相許易受

奏稿卷五十五

五

其欺乘此界務商務議論紛紜有求必應時更加迫促俾墮其計中耳旣蒙

垂詢及之謹據劉錦棠所陳覆奏伏祈

聖鑒施行謹 奏

軍機大臣奉

旨覽欽此

賊酋糾眾犯邊進剿大勝懇 獎卹出力陣亡各員弁摺

光緒五年十月

初一日
會銜

奏爲漏逸賊酋糾眾犯邊經官軍進剿大獲全勝所有尤爲出力文武及陣亡各員弁籲懇

天恩從優獎卹恭摺馳陳仰祈

聖鑒事竊布魯特賊首阿布都勒哈瑪安集延賊首愛克木汗條勒等率眾竄逼色勒庫爾通政使二等男

臣劉錦棠親率馬步二千餘人定於七月二十六日啟行前往剿辦所有進兵情形經

臣

具奏在案茲准劉錦棠九月初二日來咨稱七月二十五日據色勒庫爾阿奇木伯克阿布都勒哈山等稟報前來探得賊股竄至

奏稿卷五十五

六

蘇巴什地方距色勒庫爾祇有一站因飭伯克素唐夏等在城防守一面帶同伊什罕伯克米爾子哎克木等并居民二百出城扼紮蘇巴什南面該賊探知要隘已扼卽繞由間道踰嶺而來十九日大股已抵城下約三千餘人將城圍住祈撥大兵援剿劉錦棠以色勒庫爾城小而堅尙易固守但阿奇木伊什罕等均隔在城外恐城內各回目與居民不無驚惶該處設有疏虞勦辦較爲費手又以師行糧隨路險不能容車且聞沿邊布魯特各族被脅者多其尊崇條勒之教聞風響應者尤復不少自英吉沙爾出卡皆布魯特支帳之所爲運道所必經難保中途無梗因飭各營裹帶二十日行糧并飭喀什噶爾英吉沙爾各局星夜雇驢裝運糧料

一并隨行劉錦棠二十六日督隊由喀城啟行二十七日抵英吉
沙爾適前調之管帶壽字馬隊提督陳建厚率隊前來卽飭暫駐
英城次日復飭提督張俊提督石蘊玉率定遠中右步隊兩營并
提督胡登花率定遠左營五成隊伍帶同進剿仍畱該營五成隊
伍會同壽字一旂馬隊駐守英吉沙爾城垣八月初一日過叟齊
牙克達坂抵哈引恰提地方接據色勒庫爾守城伯克素唐夏等
稟報連日賊眾環攻率居民同心堅守二十六日早賊酋派人到
城下誘降伯克等以阿布都勒哈瑪在賊酋中素稱兇狡非設計
擒斬不可乃僞許其降約阿布都勒哈瑪前來定議阿布都勒哈
瑪信之旋即親詣城下該伯克等預選二十餘人各帶軍器出城

奏稿卷五十五

七

與阿布都勒哈瑪相見數語後王子巴什蘇乃滿等卽將該酋馬
韁扭住阿布都勒哈瑪知已中計拔刀砍落蘇乃滿數指撥馬狂
奔幸二十餘人中有名豁罕者開槍擊洞該酋背心卽時落馬而
同去各人同時開槍排擊斃賊七名餘賊飛奔伯克等割取阿布
都勒哈瑪及七賊首級入城賊黨忿甚攻城愈急盼官軍往救等
情劉錦棠得報卽改道由山路急進因巖壑崎嶇勢難迅速初三
日趨行百餘里至勤的克地方探報色勒庫爾之賊聞官軍將至
已於二十九日向北竄去初四日又改道北趨踰卡拉搭什達坂
至秦爾里安訶賊於初二日已竄至布倫可地方布倫可者西南
距色勒庫爾約四站距秦爾里安約兩日程劉錦棠以賊旣相距

四站若不覓路繞追必難及賊比令董字中右兩營定遠中左右三營各步隊及靖營馬隊西征馬隊一旂暫歸提督董福祥節制於初五日四鼓兼程先進自率總理營務處知府袁堯齡督飭親兵各哨并總兵侯名貴礮隊一旂提督譚慎典白旂馬隊一營提督楊金龍之恪中馬隊一旂軍功何振元之防勇步隊一旂及纏回各馬隊護衛輜重亦於是日辰刻繼進初十日行抵察哈爾艮疊接董福祥稟報初五日抵紮克牙哈奇初六日午刻至察哈爾艮獲賊探一名訊據供稱賊蹤相距六七十里董福祥擬乘夜襲之飭各營小憩申刻銜枚疾馳夜分至彼賊已聞信竄去初七日早追至空台根滿斯忽見前面有賊三十餘騎向木吉一路狂奔

奏稿卷五十五

六

并見所宰牛馬鮮血滿地知賊去不遠念官軍兩日一夜馳三百數十里人馬勞乏已甚然不猛進賊更遠颺遂挑步隊之健者乘隊驟隨同馬隊追逐派提督張俊率之先進董福祥率疲乏步隊護輜重繼進酉刻據張俊馳報是日午後追至木吉探賊大股麕聚距木吉六七里地方解鞍秣馬張俊整隊徐進自率數十騎登高瞭望忽見前面峻嶺夾峙大河貫入谷口賊見東南塵起知我軍追至遂列隊河南分數十團每團數百騎依山對河按次排列張俊令總兵夏辛西提督張宗本率西征一營一旂馬隊擊其左總兵田九福之董左營爲接應提督方友升率靖營馬隊擊其右提督胡登花石蘊玉之定遠左右兩營爲接應自率董字中營

定遠中營隊伍由中路擊之鏖戰半時勝負未分忽有一綠衣賊酋手執紅旂在前指揮掠陣勢甚兇悍被我馬軍槍轟落馬賊遂大敗官軍掩殺約二里許賊復回拒張俊嚴飭各營整隊奮擊斃賊多名該逆仍死拒不退夏辛酉張宗本方友升等各分哨由左右兩路繞出其前自率馬隊直貫賊陣張俊又率所部由中路奮威衝殺人自爲戰無不以一當十賊方窘蹙至極時復見官軍左右抄截去路將斷遂大潰狂奔官軍乘勝追至卡拉阿提地方時已天晚遂收隊就地爲營是夜四鼓張俊仍率隊猛追初八日午刻又復及賊沿途賊尸枕藉初九日直追至黑子拉提達坂下該逆僅贖百餘騎翻山亂竄張俊等以過山卽係俄屬阿來地界乃

奏稿卷五十五

九

止不追方賊在木吉西面爲官軍擊敗時張俊等正追賊向前董福祥率隊進至該處遙望谷口有馬馳出瞥見平川內有賊約二三百名牛羊二三千頭知爲賊眾所據在後畱牧者董福祥麾隊猛擊賊眾翻山紛竄官軍急追悉數斬之計是役共殺賊二千數百名奪獲軍械旂幟千數百件馬匹牛羊數千頭生擒悍賊六十三名內有腓色提買賣提巴巴一名玉子巴什十五名陣斬著名腓色提曰買賣賽亦提曰阿子曰亦薩克曰白奇巴圖魯曰阿里必曰開拜克拉八里曰毛拉和買賣提曰邁提哈力克曰可坎乎完提曰托乎大曰克不給克等十一名其買賣賽亦提卽前安夷帕夏阿古柏派充喀喇沙爾大通哈者也其生擒之買賣提巴巴

者卽阿古柏派充烏什大通哈者也至陣斬玉子巴什據稱有六十餘名難以悉數此八月初五至初九等日馬步各營追剿疊獲大勝之實在情形也劉錦棠以餘賊業經過山追亦無及遂飭各馬隊由阿依阿提達坂回防自率各步隊由碧勒可斯達坂回防以色勒庫爾伯克等固守城池并能誘殺巨酋厥功甚偉而城外莊稼牲畜被賊劫掠殊可矜憫因飭提督楊金龍攜帶銀兩緞匹率恪中營馬隊馳赴該處酌給犒賞以示激勸安撫事竣卽由田角塔回防緣山內道路紛歧卽各城纏回亦未嘗經歷故飭馬步各隊分路行走兼察地勢其逆酋阿布都勒哈瑪首級經楊金龍解至喀城當傳飭本地纏回與該逆素識者驗明傳首示眾除將

奏稿卷五十五

三

生擒之買賣提巴巴胖色提等六十三名訊明斬梟外其從逆之布魯特頭目庫彌什豁坎等二名已經按名拏獲解營候訊明分別辦理查阿布都勒哈瑪與愛克木汗條勒兩次糾眾犯邊狡猾兇頑愍不畏死此次率黨竄至烏魯克恰提卡外聲言奉俄國號令攻取喀什各城煽惑部眾及聞官軍布置嚴密無隙可乘遂變計往攻色勒庫爾冀取該處爲老巢爲復擾回疆張本劉錦棠聞報督隊疾馳踰越重疊達坂鑿冰開道冒險以行方擬進至伊犁克雅克地方截其歸路便可聚殲詎該逆偵知官軍進剿先已北趨當官軍行抵秦爾里安之日賊於前兩日已過布倫可地方按程計日相距數站雖派隊急追竊恐未能及賊幸董福祥張俊等

迅厲無前士氣競奮四晝夜馳八百餘里人未交睫馬未卸鞍接仗時猶復倍加抖擻愈接愈厲卒能殄此狂寇大振軍威惟此次師行所至率皆荒曠阻絕自來人迹罕到之區石壁冰梯直插霄漢鳥道陡絕士馬均須猱附而升俯視幽壑冥冥渺不見底加之煙霧嵐瘴濃濁殊常中者不省人事致弁丁之梁患急證者多而戰馬糧馱之墜崖而斃及勞傷以死者更難數計蓋自出關以來行軍之艱阻勞瘁未有若斯之甚也疊據各擒賊供稱阿布都勒哈瑪與愛克木汗條勒由俄境糾眾內犯時俄官姜達郎屬以此行務取喀什城池否則不准再入俄境賊供如一諒非無因然縱賊內犯實遺之禽於我無損則亦置之勿論可耳嗣接探報愛克

奏稿卷五十五

三

木汗條勒竄至俄境阿來所屬可苦蘇地方隨行僅三十餘人內有受重傷者五人可苦蘇北通安集延西通哈拉替根俄人將愛克木汗條勒如何安置之處應俟探明續報臣竊維新疆邊患以布魯特安集延爲最劇以壤地交錯易致弊端也而布魯特之汗互相雄長安集延之條勒爲回族所崇信故汗與條勒一有煽動內地回眾卽靡然從風轉相勾結星星之火足以燎原非乘其初發急起撲之不可也劉錦棠自克西四城後上年速剿陝回金山去冬今春雨兩剿安集延布魯特各逆此次復剿阿布都勒哈瑪愛克木汗條勒用兵不越旬時渠目幾無漏網而內地各城得安堵如故雞犬無驚者則審機之明赴機之速有以致之臣前奏以賊

由外卡之外繞攻色勒庫爾地勢崎嶇劉錦棠由喀什噶爾英吉沙爾邊境以援色勒庫爾程途較爲坦易不料賊攻堅城不下逆酋中計授首羣賊聞官軍驟至擁愛克木汗條勒狂奔避官軍而北竄劉錦棠指麾各營改由北路前截後追備嘗艱阻卒以蕞役愛克木汗條勒雖賸三十餘人遁竄俄境死灰難以復然亦概可見矣所有此次及前次速剿陝回金山及去冬今春兩剿安集延布魯特共四案尤爲出力文武員弁兵勇謹擇其尤者併爲一案繕具清單恭呈

御覽伏乞

天恩逾格准獎以示優異此外出力將士猶多應歸另案保獎庶足勵士氣而播

奏稿卷五十五

三

皇威而偉伐遐宣可增史牒之光亦可靖兵戎之氣其力戰陣亡者除勇丁四十六名已經賞卹外所有前三案擬保之副將銜補用參將王克德補用遊擊林相補用都司余繼康守備銜千總井養成辛全擬保守備黃龍輝藍翎守備銜千總賈福堂藍翎把總謝占鼇趙連珠趙鳳祥楊義林李成義蕭德春向廷珍擬保藍翎把總王新臣劉全成劉忠發湛意誠藍翎外委沈福橋等十九員名并懇

天恩敕部照擬保官階從優議卹以慰忠魂所有剿辦邊寇大獲勝仗情形謹會同幫辦甘肅新疆善後事宜前浙江巡撫臣楊昌

濬據實馳陳仰祈

皇太后

皇上聖鑒訓示施行謹 奏

光緒五年十月十四日內閣奉

上諭左宗棠奏賊酋糾眾犯邊官軍追剿獲勝請將出力陣亡各員懇恩獎卹一摺布魯特賊首阿布都勒哈瑪安集延賊首愛克木汗條勒等疊次糾眾犯邊本年七八月間竄至烏魯克恰提聲言攻取喀什噶爾等城復圍攻色勒庫爾經通政使劉錦棠督率官軍節節追剿先將阿布都勒哈瑪誘斬并生擒買賣提巴巴胖色提等多名內地各城悉已安堵剿辦尙爲得手所有此次并疊

奏稿卷五十五

三

次剿辦陝回金山及安集延布魯特各逆出力員弁均屬著有微勞自應量予獎勵單開之道員羅長祐前經賞給雲騎尉世職著改爲騎都尉世職提督董福祥張俊均著賞給頭品頂帶并賞給三代正一品封典擬保道員袁堯齡著賞給那爾琿巴圖魯名號并賞給二品封典提督張宗本著賞穿黃馬褂總兵夏辛酉著交軍機處記名遇有提督總兵缺出請旨簡放并賞給三代正一品封典提督譚慎典方友升均著遇有提督總兵缺出儘先題奏胡登花等均著賞給頭品頂帶總兵杜錫斌田九福侯名貴均著交軍機處記名遇有提督總兵缺出請旨簡放侯名貴并賞給三代正一品封典提督湯彥和張春發均著交部照頭等軍功從優議

敘楊金龍著賞換年常阿巴圖魯名號并賞給正一品封典李克
常著交部照頭等軍功從優議敘陳建厚著交部從優議敘擬保
副將劉必勝著免補副將以總兵交軍機處記名遇有缺出請旨
簡放提督段伯溪等均著交部照頭等軍功從優議敘李清貴等
均著賞給頭品頂帶劉長其等均著賞給正一品封典張果著賞
換依伯德恩巴圖魯名號王賢俊著賞換哈希巴巴圖魯名號王
春發著賞換噶爾薩巴圖魯名號總兵查春華著交軍機處記名
遇有提督總兵缺出儘先題奏李全忠等均著交軍機處記名遇
有提督總兵缺出請旨簡放李全忠并賞給壯勇巴圖魯名號陳
錦泰等二員并賞給正一品封典楊勝魁等均著免補總兵以提

奏稿卷五十五

五

督交軍機處記名遇有提督總兵缺出請旨簡放并賞給正一品
封典周天財等均著賞給正二品封典周天財并賞換芬臣巴圖
魯名號許獻德并賞換都隆額巴圖魯名號擬保總兵周義發著
賞加提督銜并賞給正一品封典總兵胡少亭著俟補總兵缺後
以提督升用并賞換奇穆欽巴圖魯名號副將姚建仁等均著免
補副將交軍機處記名遇有總兵缺出請旨簡放姚建仁等二員
并賞給正二品封典周龍渭等四員并賞加提督銜張瑞揚并賞
換博多歡巴圖魯名號擬保副將羅雲義等均著免補副將交軍
機處記名遇有總兵缺出儘先題奏羅雲義并賞加提督銜溫正
和并賞換喀勒春巴圖魯名號副將柴典漢等均著免補副將交

軍機處記名遇有總兵缺出請旨簡放柴典漢并賞換富隆阿巴圖魯名號張准并賞給正二品封典擬保副將張立德等均著免補副將交軍機處記名遇有總兵缺出請旨簡放張立德并賞換富呢雅罕巴圖魯名號趙楚南并賞換烏勒喜蘇巴圖魯名號趙輝南并賞加提督銜何美玉著免補副將交軍機處記名遇有總兵缺出請旨簡放并賞給正二品封典侯進孝等均著免補副將交軍機處記名遇有總兵缺出請旨簡放并賞給正二品封典擬保副將何有道著免補副將以總兵遇缺儘先題奏并賞

奏稿卷五十五

五

給穆特本巴圖魯名號唐加奇等均著免補副將交軍機處記名遇有總兵缺出請旨簡放參將劉占學等均著免補參將以副將遇缺儘先推補并賞加總兵銜劉占學并賞換蘇埒巴圖魯名號楊元林并賞換綽克綽歡巴圖魯名號擬保參將胡德超著免補參將以副將仍畱原省儘先推補并賞加總兵銜賞換額騰依巴圖魯名號米漢璋等均著免補參將以副將遇缺儘先推補并賞加總兵銜米漢璋并賞給確勇巴圖魯名號參將余福章等均著免補參將以副將遇缺儘先推補并賞加總兵銜內路長德并賞給利勇巴圖魯名號林志魁并賞給振勇巴圖魯名號莊偉著免補參將以副將仍畱福建儘先推補并賞加總兵銜擬保參將張

秦華等均著免補參將以副將仍畱各原省遇缺儘先推補張泰華并賞加總兵銜徐積誠并賞給信勇巴圖魯名號副將魏其德著以副將畱於甘肅遇缺儘先推補賞給直勇巴圖魯名號并正二品封典擬保遊擊李景隆著免補遊擊參將以副將仍畱原省原標遇缺儘先補用并賞給鋒勇巴圖魯名號沈凌西等均著免補遊擊參將以副將遇缺儘先補用沈凌西并賞給克勇巴圖魯名號張廷臣并賞給桓勇巴圖魯名號楊繩武等均著免補遊擊以參將遇缺儘先推補楊繩武并賞給固勇巴圖魯名號張天有馮滿盛并賞換花翎遊擊賈永清等均著免補遊擊以參將畱於陝甘遇缺儘先推補并賞加副將銜賈永清并賞給銳勇巴圖魯

奏稿卷五十五

三

名號王天珍并賞給果勇巴圖魯名號擬保遊擊文福祥著免補遊擊參將以副將畱於陝甘儘先推補吳照庭著免補遊擊以參將遇缺儘先推補并賞加副將銜遊擊俞尙智著免補遊擊以參將畱於甘肅遇缺儘先推補并賞加副將銜賞給綽勇巴圖魯名號郝忠裔著免補遊擊以參將仍畱原省遇缺儘先補用并賞加副將銜賞給揚勇巴圖魯名號擬保都司張士德等均著免補都司遊擊以參將遇缺儘先推補張士德并賞加副將銜雷登科并賞換花翎李生榮著免補都司以遊擊畱於陝西儘先補用并賞加參將銜楊大鵬著免補都司以遊擊遇缺儘先推補并賞給勉勇巴圖魯名號閻戰彪著免補都司以遊擊儘先推補并賞加參

將銜擬保守備江鏡堂等均著免補守備都司以遊擊儘先補用
內楊紹寅并賞換花翎白重陞著免補守備以都司儘先補用并
賞換花翎廖克明等均著免補守備以都司儘先補用廖克明并
賞給武勇巴圖魯名號王義圖并賞給剛勇巴圖魯名號方綬德
著免補守備以都司儘先補用并賞加遊擊銜田品堂著免補守
備以都司遇缺儘先補用并賞給捷勇巴圖魯名號擬保千總何
振元著免補千總守備以都司畱於陝甘遇缺儘先補用擬保把
總陳金玉著免補把總以千總畱於甘肅儘先拔補并賞加守備
銜賞換花翎擬保千總劉占魁等均著免補千總以守備畱於甘
肅儘先補用軍功劉其相著免補外委把總以千總儘先拔補并

奏稿卷五十五

三

賞加守備銜巡檢曠肇勳著免補本班以縣丞仍分發省分歸候
補班前補用所請將已革總兵楊德俊開復原官翎枝勇號仍交
軍機處記名遇缺簡放并免繳捐復銀兩之處著該部議奏陣亡
之擬保副將銜參將王克德遊擊林相都司余繼康守備銜千總
并養成辛全擬保守備黃龍輝千總賈福堂把總謝占鼈趙連珠
趙鳳祥楊義林李成義蕭德春向廷珍擬保把總王新臣劉全成
劉忠發湛意誠外委沈福橋均著照擬保官階從優議卹餘著照
所議辦理該部知道單併發欽此

南疆肅清案內擬保各員官階請作爲底銜片

光緒五年十月初一日

再上年克復西四城新疆南路一律肅清紅旂奏捷請獎案內光緒四年二月十二日內閣奉

上諭其餘出力文武員弁勇丁著左宗棠等查明彙案保獎等因欽此當經恭錄咨行劉錦棠等去後旋准查明出力各員開單擬保前來業經臣核定尙待各營局省關彙送齊全具奏茲劉錦棠勦辦安集延布魯特賊匪復獲大勝及去秋勦辦陝回金山股逆去冬今春兩次勦辦安集延布魯特賊匪所有尤爲出力員弁隨摺開單奏請獎敘惟查各員有於前次克復西四城南疆肅清案內已經擬保官階者均於單內聲明作爲各員底銜加保懇

奏稿卷五十五

三

恩敕卹一併註冊臣於克復西四城南疆肅清案內卽便查照開除不致重複謹附片具陳伏乞

聖鑒訓示施行謹 奏

軍機大臣奉

旨著照所請該部知道欽此

請 敕令劉錦棠幫辦新疆軍務片

光緒五年十月初一日

再通政使司通政使二等男法福靈阿巴圖魯臣劉錦棠出關以來克復各城勳績丕著疊蒙

天恩不次擢用

優加賞賚遐邇聞知同深感服其見辦善後事宜因地施治寬猛得宜吏畏民懷已覩成效洵一時傑出之才非臣衰庸所能及也維邊方之任非賢能不足宏茲遠謨亦非重其事權不足舒其蘊蓄竊見俄人近時目覩劉錦棠勳望日盛不免因畏憚而生忌嫉之心動輒造謠傳播妄思搖撼古云盜憎主人固無足怪惟威名日久疑謗易滋無以寒遠人之膽又飛鳥未盡良弓已藏足隳任

奏稿卷五十五

完

事之氣區區愚忱不敢不盡伏懇

天恩併案論功將劉錦棠

優賞欽差銜

敕令幫辦新疆北路軍務以彰

殊眷而資鎮壓之處伏候

聖裁仰乞

慈鑒訓示施行謹 奏

軍機大臣字寄光緒五年十月十四日奉

上諭左宗棠奏請敕劉錦棠幫辦新疆北路軍務等語通政使劉錦棠自收復南路各城後辦理一切善後事宜諸臻妥協見在布

魯特安集延等眾疊次竄擾邊境南路防務尙未能鬆劉錦棠駐紮該處正資鎮撫且金順幫辦軍務本係統兵駐紮北路茲左宗棠請敕劉錦棠幫辦北路軍務是否另有命意所在著卽據實詳細覆奏再降諭旨將此由六百里諭令知之欽此

光緒六年正月內閣奉

上諭通政使司通政使劉錦棠著幫辦新疆軍務欽此

覆陳交收伊犁事宜摺

光緒五年十月二十一日

奏爲遵

旨覆陳仰祈

聖鑒事竊臣於九月初九日欽奉八月二十三日

上諭總理各國事務衙門奏籌辦交收伊犁事宜請敕疆臣覈議一摺據稱連接崇厚電報內稱約章見皆定議崇厚定於八月初八日起身赴黑海畫押後卽由南洋回京覆命并將見議條約十八款摘要知照詳加覆核償費一節尙不過多通商則事多軼轍分界則弊難枚舉亟宜籌畫布置迅圖補救各等語崇厚出使俄國固以索還伊犁爲重而界務商務關繫國家大局者自應熟思

奏稿卷五十五

三

審處計出萬全且曩經總理各國事務衙門電致崇厚若照來函有礙大局節略內并言所損已多斷不可行該大臣尤應遵照辦理設法與之辯論乃竟任其要求輕率定議殊不可解見在俄約旣輕議定其第七款所稱中國接收伊犁後陜爾果斯河西及伊犁山南之帖克斯河歸俄屬第八款所稱塔城界址擬稍改是照同治三年議定之界又於西境南境劃去地段不少從此伊犁勢成孤立控守彌難況山南劃去之地內有通南八城要路兩條關繫回疆全局尤非淺鮮至第十款於舊約喀什噶爾庫倫設領事官外增出嘉峪關烏里雅蘇臺科布多哈密吐魯番烏魯木齊古城七處亦欲酌設領事第十四款并有俄商運俄貨走張家口嘉

峪關赴天津漢口過通州西安漢中運土貨回國同路之語不特
口岸過多并與華商生計亦有妨礙自應設法挽回以維全局左
宗棠於新疆情形瞭如指掌金順錫綸久在西北各路諳習邊情
且西路通商應如何布置始能害少利多左宗棠必有權衡至張
家口漢口係南北洋分轄地方所有通商諸務亦應彼此通籌著
左宗棠金順錫綸將界務商務各條款悉心酌覈李鴻章沈葆楨
素顧大局除商務各條詳加籌畫外其界務如何辦理始臻周妥
之處分別詳細密陳該衙門另片所陳界務尤關緊要就崇厚寄
來分界圖說中國如何可設法布置即當妥爲辦理若必不可允
則邊防尤宜及時籌辦各等語此事一出一入關繫綦重左宗棠
督辦軍務事權歸一尤當通籌全局權其利害輕重一併核議密
速具奏原摺片均著鈔給閱看將此由六百里各密諭知之欽此
同日欽奉八月二十四日

奏稿卷五十五

三

上諭昨因總理各國事務衙門奏崇厚與俄國商辦交收伊犁事
宜輕率定議畫押當經諭令左宗棠籌畫密奏本日據左宗棠奏
覆陳邊務一摺所陳界務商務大略及妨民病國各條慮遠思深
洵屬老成之見特崇厚見已定議畫押事機已誤惟有亟籌補救
設法挽回著左宗棠懷遵昨日諭旨將商務界務如何辦理始臻
周妥之處或約章必不可允邊防一切如何布置始無患生肘腋
之虞詳細籌度妥議具奏等因欽此跪誦之餘敬悉我

皇上軫念邊陲

勤求馭遠方略

聖謨廣運明照無遺曷勝欽服竊維

國家建中立極東南濱海西北以崑崙枝幹爲界畫向與俄羅斯不相聯接以蒙部哈薩克布魯特浩罕爲之遮蔽間隔也近自俄人日迫誘脅日眾哈薩克布魯特各部落多附俄人俄又取浩罕三部落拓其邊圉於是俄與中國邊境毗連無復隔閼矣適中原兵事方殷未遑遠略俄人乘間佔據伊犁藉稱代我收復爲要素計并照其國法按竈科賦以充兵費亦稱饜足矣

朝廷重念邦交既予以代我收復之名并允給償款盧布五百萬

奏稿卷五十五

三

圓盧布亦呼嚕布卽所稱俄元者也光緒三年西洋新聞紙在俄國議願得俄元二百五十萬交還伊犁海上傳播未必無因此次償款忽議增五百萬圓其挾詐相嘗已可槩見至界務與商務兩者相因西北與東南事體各別道光中葉以後泰西各國船礮橫行海上闖入長江所爭者通商口岸非利吾土地也亦謂重洋迢遞彼以客軍深入雖得其地終無全理戰則勢孤守則費鉅合從之勢旣成獨據則誨爭分肥則利薄也中國削平髮捻兵力漸強製礮造船已觀成效彼如思逞亦有戒心而渝約稱兵各國商賈先失貿易之利苟且相安無事其亦知難而息焉若夫俄與中國則陸地相連僅天山北翰爲之間隔哈薩克安集延布魯特大小

部落從前與準回雜處者自俄踞伊犁漸趨而附之俄已視爲己有若此後蠶食不已新疆全境將有日蹙百里之勢而秦隴燕晉邊防且將因之益急彼時徐議籌邊正恐勞費不可殫言大局已難覆按也夫陸路相接無界限可分不特異日無以制憑陵卽目前亦苦無結束不及時整理坐視邊患日深殊爲非計俄人佔踞伊犁之始謂俟我克復烏魯木齊瑪納斯卽當交還比官軍連下各城并克復南疆而俄不踐前言穩踞如故方且庇匿叛逆縱其黨類肆出窺邊上冬今春陝回及布魯特汗安集延條勒入犯時官軍獲生賊訊供搜有俄官路票昨次布魯特安集延諸賊由俄境阿來地方出竄經官軍剿洗殆盡漏網數十人仍遁匿俄境據活賊口供亦由俄官驅遣所致四次縱賊犯邊官軍追賊均未越俄界一步我之守約如此彼之違約如此尙何信義可言當崇厚與俄官議交伊犁時俄人首以恩赦爲請并以曉示難於徧及爲慮崇厚奏聞

諭旨敕臣照辦臣謹遵

旨并會同金順出示曉諭伊犁漢陝纏土各回民等宣布

皇恩以安反側金順卽派提督殷華廷齎示前赴伊犁張貼俄官七河巡撫忽變前議將殷華廷擋回不令貼示藉稱應候圖爾齊斯坦總督回信比金順二次遣殷華廷復往探詢七河巡撫竟派人阻之伊犁境外不准復入似此任意把持不獨違慢

朝旨并置其君與外部諸臣成議於不願其悖謬又如此俄之佔踞伊犁也將大城西北三城廬舍墮爲平地迤東清水河塔爾奇綏定三城均毀棄以居漢回蘆草溝城盤子等處均棄而不守而取各城堡木料於大城東南九十里金頂寺營造市廛幾二十里

臣上年十月二十二日覆陳摺內已略言之茲據金順錫綸所言伊犁情形亦同察俄人用心殆欲踞伊犁爲外府爲佔地自廣藉以養兵之計久假不歸布置已有成局我索舊土俄取兵費鉅資於俄無損而有益我得伊犁只賸一片荒郊北境一二百里間皆俄屬部孤注萬里何以圖存況此次崇厚所議第七款接收伊犁後陔爾果斯河及伊犁山南之帖克斯河歸俄屬無論兩處地名

奏稿卷五十五

五

中國圖說所無尙待詳考但就方向而言是劃伊犁西南之地歸俄也自此伊犁四面俄部環居官軍接收墮其度內固不能一朝居耳雖得必失庸有倖乎武事不競之秋有割地求和者矣茲一矢未聞加遺乃遽議捐棄要地贖其所欲譬猶投犬以骨骨盡而噬仍不止目前之患旣然異日之憂何極此可爲嘆息痛恨者矣

金順錫綸之擬緩收伊犁而以沿邊喀什噶爾烏什精河塔爾巴哈臺四城宜足兵力濬餉源廣屯田堅城堡先實邊備自非無見惟伊犁見無定議謀新疆者非合南北兩路通籌不可見在伊犁界務未定則收還一節自可從緩計議喀什噶爾烏什規畫已周毋庸再議其塔爾巴哈臺精河急需加意綢繆應由金順錫綸自

行陳奏請

旨外所有崇厚定議畫押十八款內償費一節業經奉有

諭旨第八款所稱塔城界址擬稍改照同治三年議定界址尙只電報應俟崇厚奏到再議第十款於舊約喀什噶爾庫倫設領事官外復議增設嘉峪關烏里雅蘇臺科布多哈密吐魯番烏魯木齊古城七處第十四款并有俄商運俄貨走張家口嘉峪關赴天津漢口過通州西安漢中運土貨回國均經總理衙門奏奉

諭旨指駁外第二款中國允卽

恩赦伊犁居民業經遵

旨照辦被俄官截阻齎示委員不准張貼第三款伊犁民人遷居

奏稿卷五十五

三

俄國入籍者准照俄人看待意在脅誘伊犁民人歸俄而以空城貽我與截阻齎示委員同一用心第四款俄人在伊犁准照舊管業伊犁雖還中外商民雜處無界限可分何以自守至商務允其多設口岸不獨奪華商生計且恐蔓延日廣枝節橫生總理衙門原奏籌慮深遠實已纖細畢周

諭旨允行則實受其害應設法挽回以維全局竊維邦交之道論理而亦論勢本山川爲疆索界畫一定截然而不可踰彼此信義相持垂諸久遠者理也至爭城爭地不以玉帛而以興戎彼此強弱之分則在勢而不在理所謂勢者合天時人事言之非僅直爲壯而曲爲老也俄踞伊犁在咸豐十年同治三年定界之後舊附

中國與中國民人雜處各部落被其脅誘俄官卽視爲所屬藉以肆其憑陵俄之取浩罕三部也安集延未爲所併其酋阿古柏畏俄之偏袒其部眾陷我南疆我復南疆阿古柏死逆子竄入俄境俄乃認安集延爲其所屬欲藉爲侵佔回疆腴地之根見冒稱喀什噶爾住居之俄屬本隨帕夏而來安集延餘眾俄之無端冒爲已屬實與交還伊犁仍畱復踞地步同一居心觀其交還伊犁而仍索南境西境屬俄其詭謀豈僅在此數百里土地哉界務之必不可許者此也俄商志在貿易本無異圖俄官則欲藉此爲通西於中之計其蓄謀甚深就商務言之俄之初意只在嘉峪關一處此次乃議及關內并議及秦蜀楚各處非不知運腳繁重無利可圖蓋欲藉通商便其深入腹地縱橫自恣我無從禁制耳嘉峪關設領事容尙可行至喀什噶爾通商一節同治三年雖定約實辦迄未舉行此次界務未定姑從緩議而烏里雅蘇臺科布多哈密吐魯番烏魯木齊古城等處廣設領事欲因商務蔓及地方斷不可許此商務之宜設法挽回者也此外俄人容納叛逆白彥虎一節崇厚曾否與之理論無從懸揣應俟其復

命時請

旨確詢以憑核議臣維俄人自佔據伊犁以來始以官軍勢弱欲誑榮全入伊犁陷之以爲質既見官軍勢強難容久踞乃藉詞各案未結以緩之此次崇厚全權出使曠布策先以巽詞餽之枝詞

惑之復多方迫促以要之其意蓋以俄於中國未嘗肇起衅端可
間執中國主戰者之口妄忖中國近或厭兵未便卽與決裂以開
邊釁而崇厚全權出使便宜行事又可牽制疆臣免生異議是臣
今日所披瀝上陳者或尙不在俄人意料之中當此時事紛紜
主憂臣辱之時苟心知其危而復依違其間欺幽獨以負

朝廷耽便安而誤大局臣具有天良豈宜出此就事勢次第而言
先之以議論委婉而用機次決之以戰陣堅忍而求勝臣雖衰庸
無似敢不勉旃除烏里雅蘇臺科布多邊務應請

旨敕下該將軍大臣預籌布置以臻妥慎外所有新疆南北兩路
軍務臣既身在事中自當與各將領敬慎圖維以期有濟見調南

奏稿卷五十五

奏

疆立功後告假回籍飭赴喀什噶爾軍營換防之頭品頂帶題奏
提督陝西漢中鎮總兵騎都尉世職伯奇巴圖魯譚上連挑帶舊
部一營并統楊昌濬所練關內三營赴肅俟明春凍解先赴喀什
噶爾仍歸劉錦棠總統外并催頭品頂帶記名提督甘肅甯夏鎮
總兵一等輕車都尉世職嘎什普祥巴圖魯譚拔萃頭品頂帶記
名提督甘肅巴里坤鎮總兵騎都尉世職加一雲騎尉霍隆武巴
圖魯席大成頭品頂帶記名提督騎都尉世職額爾克巴圖魯戴
宏勝由籍挑選舊部到甘分統楊昌濬所練之關內各營馳赴喀
什噶爾均歸劉錦棠總統以厚兵力而資分布臣率駐肅親軍增
調馬步各隊俟明春凍解出屯哈密就南北兩路適中之地駐紮

督飭諸軍妥慎辦理所有進止遲速機要應祕密者卽據所見函商總理衙門核酌務期內外一心堅不可撼維持大局仰副

宸謨見將軍械先運哈密諸凡布置已有端緒其軍餉一切最關

緊要臣與楊昌濬往復籌商如果各省關三年以內能符原議每

年解足五百萬兩而各省應解金順錫綸金運昌張曜各專餉又

歸有著不致分臣餉力則此次應用應增之費尙可於臣軍餉內

騰挪挹注毋庸另請增撥合無仰懇

天恩敕軍機處戶部嚴催各省應協各款迅卽大批起解以速補

遲庶甘肅新疆大局可期無誤時事之幸亦微臣之幸也謹一併

據實覆陳伏乞

奏稿卷五十五

奏

皇太后

皇上聖鑒訓示施行謹 奏

軍機大臣字寄光緒五年十一月初五日奉

上諭左宗棠奏覆陳交收伊犁事宜一摺俄人此次與崇厚所議約章流弊甚大覽左宗棠所奏洞澈利害深中窾要刻下崇厚計將回京俟其覆命後所有原議各條應准應駁朝廷自當權衡辦理該督所稱先之以議論決之以戰陣自是剛柔互用之意所有新疆南北兩路邊防事宜卽著該督豫籌布置以備緩急之用所慮者吉林黑龍江一帶均與俄疆毗連不無防範難周之處將來操縱機宜該督必能通籌全局謀定後動也見在伊犁界務未定

所有塔爾巴哈臺精河等處應如何加意綢繆之處并著與金順錫綸妥商籌辦至烏里雅蘇臺科布多兩城餉絀兵單難於自固該督亦當統籌兼顧以維全局所請敕催協餉一節刻下籌辦邊務關繫緊要必須餉需充足方可措手著戶部查明各省應協左宗棠及金順錫綸張曜金運昌各專餉嚴催大批速解毋稍遲誤原摺畱中將此由六百里密諭知之欽此

奏稿卷五十五

覆陳李鴻章所奏各節摺

光緒五年十一月初二日

奏爲遵

旨議覆恭摺仰祈

聖鑒事竊臣於十月十六日承准軍機大臣密寄光緒五年十月初四日奉

上諭李鴻章奏遵議交收伊犁事宜一摺據稱議定約章通商各款耗損已多至分界之事伊犁西界劃去數百里其患猶淺南界劃去亦數百里跨踞天山隔我南八城往來要道心殊叵測惟崇厚業經定議若不允准又恐因此啟釁惟有竭力挽回并於立法用人二者認真籌畫或可稍資補救等語此事前已兩次諭令該

奏稿卷五十五

聖

督悉心籌議本日李鴻章所奏各節著左宗棠一併妥議具奏原摺著鈔給閱看將此由六百里密諭知之欽此臣細閱李鴻章原摺持論名通於界務商務言之確鑿其中如彼此民人雜處則界限仍未分明添設口岸太多則辦理易生枝節兩語尤爲扼要臣於十月二十一日摺內已將愚見所及舉以入

告其未盡之意則於致總理各國事務衙門書中言之區區之愚竊謂俄自竊踞伊犁以來無日不以損中益西爲務蓄機已深此次崇厚出使乃始和盤托出若仍以含糊模稜之見應之我退而彼益進我俯而彼益仰其禍患殆將靡所止極不僅西北之憂也譬猶人患痞塊本非和甘平淡諸藥所能爲功庸醫但顧目前不

敢用峻利之劑則痞證與人相終始無復望其有病除身壯之一日今日中俄之勢何以異此伏望

聖慈於崇厚復命之日將所議各款下軍機大臣總理衙門六部九卿及將軍督撫臣會議孰准孰駁各本所見條舉以

聞其所不知或知之不詳者則聽其闕焉俾得各抒其靖獻之忱以達其竭忠盡力之意於義固爲有合又數月來欽奉

密諭又總理衙門各疏微言大義深切著明足令外人心折應宣示者亦予宣示謨謀者天下之大公何庸祕密亦足令新聞小說不致淆惑視聽也愚昧之見謹一併陳之伏乞

皇太后

奏稿卷五十五

望

皇上聖鑒訓示施行謹 奏

軍機大臣奉

旨覽欽此

被議總兵劉楚華請暫緩赴戍畱防效力摺

光緒五年十一月初二日

奏爲三省邊防緊要懇

恩准將因案被議之將領暫緩赴戍以資鎮壓而重地方恭摺馳陳仰祈

聖鑒事竊查陝西漢中一鎮縮轂秦隴蜀三省地方流民雜處防務最關緊要上年統帶律武營署漢中鎮總兵甘肅提督李輝武因病出缺適值荒旱之後該處官紳軍民均以鄰匪甚眾伏莽堪虞爲言經臣商同前陝西撫臣譚鍾麟會奏於李輝武舊部將領中遴得提督銜總兵劉楚華檄飭接統律武全軍分防各要隘年餘之久該處奸匪斂迹軍民和洽相苾以安共爲幸慰譚鍾麟入

奏稿卷五十五

聖

覲時適劉楚華因四川東鄉案牽連被議革職發往軍臺效力贖罪稟求交卸譚鍾麟飭其暫緩交卸以順輿情擬俟回陝時與臣公同商議再爲會奏請

旨遵行臣近接據劉楚華來稟被議革職奉

旨發往軍臺效力贖罪見奉部文催解甚急所部律武等營是否派員接統抑應概與遣撤以便交卸赴戍等情請示前來臣維四川東鄉一案劉楚華并未在事查其被議原奏以劉楚華隨同王照南攻勦鳳頭寨因搜拏梟匪馬洪崙致格殺唐姓多命請交部議處是否據鳳頭寨之馬洪崙本係梟匪罪在不赦所應議者格殺唐姓多命一節而原奏內又稱向若璠素與唐樂籍有隙其圍

丁引勇燒毀房屋經唐樂籍之子唐占元呈控有案且查攻鳳頭寨本係律武營分統王照南之川軍三營及劉楚華所帶之陝軍兩營向若璠所引燒毀唐樂籍房屋之勇丁當時并未指明何營勇丁亦未據唐占元呈控劉楚華殺斃多命有案原奏未予重議自非無因卽部議劉楚華隨同王照南攻勦鳳頭寨因搜拏梟匪馬洪崙致格殺唐姓多命定擬照過失殺律收贖較之全案罪名爲輕較之同案之王照南亦稍有區別臣於隔省重案自可毋庸置喙惟念漢南地方山多地闊最易藏奸川鄂簽會各匪蔓延甚廣鹽梟句結竊發堪虞僅鎮標制兵千餘人不敷控禦全賴防軍分駐乃資捍衛若概議遣撤要隘固屬空虛當此冬巡喫緊之際

奏稿卷五十五

醫

一旦將勁卒遣撤令其散處山谷尤慮隱憂方大防不易防易員接統本軍旣難其人改委外營將官又慮恩信未孚致多轆轤查劉楚華本漢南舊將分統律武營有年素得兵民之心其廉勇樸幹於地勢民情最稱諳習二次奉調赴川備訊尙未回防之時漢南紳耆士庶向該管道府紛紛遞呈乞畱惟恐頓失所託曾經署陝安道勞文翹等據情轉稟有案可稽茲因部文催解甚急無計挽畱輿情依戀維殷亦有難於忍置者合無仰懇

天恩俯念三省邊防關重要地需才准將統領律武等營已革總兵劉楚華暫緩起解畱防效力以資鎮壓抑或准其措繳臺費銀兩免其赴戍之處出自

逾格鴻施臣爲愼重邊防起見謹據實馳陳伏乞

皇太后

皇上聖鑒訓示施行謹 奏

光緒五年十一月十四日內閣奉

上諭左宗棠奏防務緊要請將被議將領暫緩赴戍一摺據稱已革總兵劉楚華統帶律武全軍防守漢南有年深得兵民之心前因四川東鄉案內被議革職發往軍臺效力贖罪見在防務緊要請將劉楚華畱防暫緩赴戍等語劉楚華著准其繳清臺費銀兩免赴戍所仍畱營效力以贖前愆該部知道欽此

覆陳革員殺斃旌善營弁丁一案摺

光緒五年十一月初八日

奏爲覆陳革員殺斃旌善營弁丁多命一案仍請

敕下刑部核擬定罪以期明允恭摺詳陳仰祈

聖鑒事竊臣前奏督審革員俞應鈞等殺斃旌善營弁丁多命一

摺奉

旨刑部議奏部議案情未確令再提全案人證嚴鞫確情按律妥擬具奏奉

旨依議欽此由部咨行到臣比經札飭臬司史念祖查照部駁各情秉公覆訊詳辦并提全案卷宗到營逐一細閱查此案初奉

諭旨交前烏魯木齊都統英翰審訊英翰因總統湘軍升用道員

奏稿卷五十五

吳

劉錦棠所稟各情核與俞應鈞原稟格殺陝回情形迥不相同俞應鈞等供詞狡展堅不吐實自係未經刑訊而然請

旨敕交有司刑名衙門訊辦旋奉

諭旨此案情節重大亟應澈底根究以成信讞著左宗棠督飭臬司提集人證卷宗秉公嚴訊務得確情按律定議具奏欽此臣比

欽遵飭發犯證卷宗交臬司衙門收審疊據史念祖率同承審委員蘭州府知府恩霖等提集犯證卷宗悉心推鞫情狀確實取具

供招具詳前來臣覆核無異惟因此案情節重大律無定罪專條

奏請

敕下刑部覆核定擬以昭明慎茲准刑部咨行遵

旨議奏原摺於臣前奏一議其聲敍未詳一疑其非情理所應有一議已死回勇是否十八名自有屍身可據曾否委員相驗一議原帶官黑萬貴是否在落後回勇之內事後并未確查亦未將印文照票起獲被殺回勇是否係採買馬匹之勇既無文照又無證佐指認一議該革員所稱廚役謝斯茂及告假勇丁張啟泰曾說此起回勇內有馬三一名係賊目余小虎黨夥何以并未取具謝斯茂等供一議該革員殺斃人數及起獲銀兩與劉錦棠原稟因何不符請

旨敕臣再提集全案人證嚴鞫確情按照律例妥議具奏臣細閱部文於此案情節尙少疑端於臣原奏多所駁詰無非因案情重

奏稿卷五十五

七

大推鞫不厭精詳以期愼益加愼俾免枉縱之意謹案營務處之設所以贊畫戎機經理庶務由統領大員派員承充本非例定職守其地方公事應由地方衙門辦理營務處向不干預惟遇奸匪溷雜形迹可疑關涉軍營之件或由營務處同地方官查拏訊究或由統領派委審辦事所常有其同地方官查拏訊究者敍供定讞後地方官報明本管上司營務處報明統領聽候准駁無徑由營務處拏犯審問不會商地方官不報明統領遽行斬決多命者此案兪應鈞殺斃旌善弁勇係兪應鈞獨在臺階喝砍綏來知縣榮還并未同場事後榮還向詢殺者姓名及犯供兪應鈞答以捏造姓名添造情節便了茲准部議以營務處駐紮地方於公事是

否應管遇有形迹可疑應否准其查拏訊辦爲言謂原奏未及詳細聲敘查此案先經金順具奏營員與地方官會同查拏行劫陝回擅自全行格殺請

旨將俞應鈞榮還孔才先行革職并奏交英翰訊究臣督審此案又在英翰改交刑名衙門之後自無庸追論俞應鈞是否應管及應否准其查拏訊辦原奏之未及詳細聲敘并非不合也部議劉錦棠派令守備黑萬貴帶回勇二十三人採買馬匹既有管帶之責并有隨身印文照票自不容任令先後行走漫無紀律所稱回勇十八人先行投店其餘回勇五人行走落後等語殊非情理所應有查軍營開拔及接仗出隊則分哨分隊成列而行平日奉派

奏稿卷五十五

契

出差則零星派撥既非隊伍可比自無紀律可言此次旌善回勇採買馬匹原因添補疲乏缺額起見由營官開列買馬弁丁名單呈由統領給與印文照票發交見銀赴瑪納斯隨行之人有同哨不同隊者有同營不同哨者黑萬貴既非其素日管帶其回勇行走遲速各視坐馬之得力與否其間攙前落後難於一律取齊不得謂非情理所應有也部議已死回勇是否十八名自有屍身可據會否委員相驗亦未聲明臣維回勇二十三名赴瑪納斯採買戰馬係由劉錦棠核准給札其先到瑪納斯之十八名據革員俞應鈞供在客店內問明察看如數令赴副將衙門掛號因其不服盤詰遽行喝砍同時畢命就中割取首級七顆梟示外將所有屍

身拋棄城北水坑是被殺回勇之數雖與劉錦棠不符而此起回勇十八名均經俞應鈞兩次查過可據特時當溽暑薰蒸屍身易於發變其分應相驗之地方官榮還係與知此案列名上稟之人自不以相驗爲意迨金順接得捏造格殺行劫回勇稟報但知所殺是行劫陝回故未委員相驗且事隔許久屍身早經發變亦已無可相驗矣部議謂究竟是否十八名自有屍身可據曾否委員相驗亦未聲明不知屍經發變相驗無從案經捏造被殺者係屬罪人金順當時無委員相驗之理原奏雖未及聲明而毋庸聲明之故本自了然也部議黑萬貴是否在落後回勇之內事後并未確查下落亦未將印文照票起獲是被殺回勇是否係探買馬匹

奏稿卷五十五

吳

之勇既無文照又無證佐謹按黑萬貴帶同回勇共二十三名赴瑪納斯買馬先到十八名甫經投店俞應鈞到店內向其盤問據稱見只到十八人所帶印文照票在行走落後五人身邊尙未到店俞應鈞傳其赴副將衙門掛號即將此起十八名概行殺斃黑萬貴自未在此起十八名數內當時瑪納斯軍民恨回最深因官軍捕殺行劫陝回見回卽混行毆殺黑萬貴後到正俞應鈞喝砍回勇之際其爲亂刃所斃固在意中所帶印文照票當時既無人過問事後更無從搜取部議疑其未確查下落并疑被殺之回非卽買馬回勇不知臣督審此案事隔金順英翰兩手當時證據已無從搜求惟確查黑萬貴等一行二十三人并未歸營又未歸籍

迄無下落其時別無陔回行劫之案而買馬回勇離營抵瑪納斯時日正與俞應鈞格殺行劫陔回相值是買馬回勇無下落而究有下落也計回勇二十三名除俞應鈞喝砍十八名畢命外後到者又被軍民混殺無一生還則其同罹此劫固無疑也至該革員所繳贓銀與劉錦棠原稟數目不符英翰比時未及查追亦因案供未定又後到回勇所帶印文照票銀兩均無取獲自未便併向該革員追究臣督審此案擬從緊要情節有關罪名出入者研訊取供其英翰未及查追各件事已過時又無證據固未宜逐一推求致滋訟累也部議該革員所稱廚役謝斯茂告假勇丁張啟泰會說此起回勇內有馬三一一名係賊目余小虎黨夥何以并未取

奏稿卷五十五

五

具謝斯茂供詞查謝斯茂張啟泰所稱此起回勇內有馬三一一名本該革員所供意欲藉此自明其因疑致誤之故原奏會詰其如果屬實則當時應傳謝斯茂張啟泰指認馬三提出訊究何以并不傳其指認據該革員供稱當時亦會傳其指認尙未趕到革員一時氣忿不及等候遽喝綁砍則該革員所供均隨口編造支飾之詞究竟謝斯茂張啟泰是否有馬三在內之語固不爲憑卽該革員會傳指認之供亦不足據況劉錦棠所開買馬回勇二十三人名單具在本無馬三之名也謝斯茂張啟泰一係榮還廚役一係遣撤客勇事已過時無從覓其蹤迹原奏之未取有供詞非有他也竊維此案故殺無辜多命實該革員俞應鈞爲首就供以定

罪故殺之罪固無可減而按律以定擬故殺十八命法實無可再加臣於法家之學素少講求行營既無則例可查又無刑名幕友可資討論因求其生而不得是以有

敕刑部覆核定擬之請以示天下之平伏懇

聖慈俯念此案情節重大

敕下刑部都察院大理寺會同覆核定擬奏請

聖裁庶要案速結俾免畱獄致滋物議實爲幸甚謹具摺陳明伏乞

皇太后

皇上聖鑒訓示施行謹 奏

奏稿卷五十五

軍機大臣奉

旨另有旨欽此

光緒元年正月初一日起至三年十二月底止軍需款目報銷摺
光緒五年十
一月初八日

奏爲光緒元年正月初一日起至三年十二月底止軍需收支款
目遵

旨開單報銷恭摺具陳仰祈

聖鑒事竊臣前以西征軍需收支款目繁鉅部議分別造冊開單
礙難照辦瀝陳實在情形請自同治十三年正月起截至光緒三
年十二月底回疆肅清止分作兩案一律開單報銷以昭核實而
歸簡易各情於光緒四年十二月十七日拜摺具陳本年三月初
四日差弁齎回原摺奉

奏稿卷五十五

五

旨著照所請該部知道欽此當於本年四月十一日將同治十三
年分收支各款彙爲一案欽遵開單專摺奏報奉

旨該部知道單併發欽此跪聆之下仰見

聖明崇實黜浮至意下懷欽感莫可名言茲據辦理陝甘後路糧
臺湖南補用道王加敏辦理駐陝軍需局署理陝西按察使陝安
道沈應奎會詳稱光緒元年正月初一日起截至三年十二月底
回疆肅清止一切收支款目彙爲一案收款則以奉撥部帑并各
省關協餉洋商借款商號挪借及前次單開實存餉銀爲大宗其
次則捐輸稅釐丁課各營兵勇截曠臺局扣收平餘諸雜款與夫
穆圖善雷正綰各軍專餉由臣統收分撥者內除撥交穆圖善金

順英翰明春自行造報之款暨解交烏里雅蘇臺借用西征糧臺
餘存駝價以及撥還前次單開此案挪借軍餉銀兩一併劃清外
茲截至三年十二月底止共管收銀二千六百七十四萬五千九
百二十一兩五錢九分六釐一毫五絲九忽六微此入款之實數
也支款則以馬步各營旂弁勇歷年應支口糧暨補發前單積欠
口糧以及津貼各營糧料價值水陸轉運腳價撥解餉銀匯費爲
大宗次則採辦軍裝軍火旂幟號衣帳棚洋槍洋礮子藥銅冒以
及車騾鞍屨什物等項又次則商號利息隨營辦事各臺局當差
文武員弁薪水書役工匠護勇長夫口糧紙張油紅等費又次則
各處屯墾經費漢回安插賑濟津貼州縣辦公奉差員弁川資傷

奏稿卷五十五

五

亡員弁兵勇卹賞各等項通截至光緒三年十二月底止共支銀
二千六百四十五萬二千六百三十兩九錢三分八釐六毫二絲
五忽二微此出款之實數也以出抵入應存銀二十九萬三千二
百九十兩六錢五分七釐五毫三絲四忽四微歸光緒四年正月
以後支用造報而本案欠發及前單積欠之款各營軍餉除裁撤
歸併各營註銷欠餉不再補發外實欠發銀四百三十八萬一千
九百一十六兩七錢一分一釐九毫六絲八忽七微各營傷亡弁
勇卹賞養傷則實欠銀三十一萬四千三百九兩五錢四分七毫
三絲八忽二微又欠發此次入款項下列收洋商暨各臺局挪借
各款銀六百零七萬五千八百兩均係實欠應還之款應統俟光

緒四年正月以後收到協餉陸續撥還另案造報以清界限據王加敏沈應奎等開具清單詳請覈明具奏前來臣維此案報銷分年攤計用款比之歷年爲數較多誠以大軍遠征荒徼萬里轉輸致一鍾而費十鍾每糧一石運至軍前積價至數十金卽軍裝軍火等件無不運價倍於採價此腳價匯費一項較前案加多之實在情形也至華洋各商號利息多於前案幾將十倍蓋由本案協餉不時挪借過多以致息銀積成鉅款其弁勇口糧製造軍火文武員弁薪水屯墾經費等項均較前案略有加增則以出關後各營不扣糧價新疆關地日廣捍衛藉資器械辦事需員克復城池隨地安插戶口時事不同勢難畫一業經另片陳明在案臣職兼度支惟有隨時隨事力求核實以期仰副

奏稿卷五十五

奏

宸衷茲據該臺局開單會詳到營臣覆覈無異謹遵

旨將光緒元年正月初一日起至三年十二月底回疆肅清日止收支各款彙爲一案繕具簡明清單恭摺敬呈

御覽懇

恩敕部覈銷其光緒四年正月以後軍需收支款目臣已飭令該臺局隨時清釐以備另案具奏伏乞

皇太后

皇上聖鑒訓示施行謹 奏

謹將臣督辦新疆軍務自光緒元年正月初一日起截至二年十

二月底回疆肅清止彙爲一案收支款目總數開具清單恭呈御覽

計開

一前次單開截至同治十三年十二月底止實存餉銀一十萬八千六百六十二兩七錢九分八釐八毫三絲七忽八微

又查前次單開截至同治十三年十二月底止實共欠發各營旂軍餉銀八百四十五萬三千二百八十二兩一錢四分二毫五絲八忽一微又欠發各營旂陣亡受傷弁勇卹賞養傷銀三十六萬六千六十兩六錢七分二釐二毫又欠還挪借各商號銀二百三十五萬三千一百九十兩二錢四毫一絲六忽一微以上三項均於前次單內聲明在於光緒元年以後收到餉銀內陸續撥還奏准照辦在案理合登明

奏稿卷五十五

五

自光緒元年正月初一日起至三年十二月底止

一收戶部兩次撥解西征軍餉銀三百一十九萬九千六百三十兩查上項銀兩係於光緒二年間收直隸委員解到戶部在於庫存四成洋稅項下籌撥銀二百萬兩分作四批發交順天委員領解直隸另由直隸委員遞解到陝業經照數兌收又光緒三年間收山西委員解到戶部在於庫存四成洋稅項下籌撥銀一百萬兩又在漕折項下籌撥銀二十萬兩共銀一百二十萬兩分作三批發交順天委員領解直隸轉解山西另由山西委員遞解到陝

內第一批內共短平銀三百七十兩當經西征糧臺詳請咨部查照在案實收銀一百一十九萬九千六百三十兩連二年收到之款合符前數理合登明

一收戶部撥解景廉軍營餉銀三十萬兩查上項銀兩係戶部在於庫存四成洋稅項下撥發景廉軍餉奏明改交_臣營之款當經西征糧臺委員赴部領解回陝解交_臣營轉解金順收用在案茲經照數列收理合登明

一收浙江省解到協餉銀三百四十六萬二千二百三十一兩又收浙江省解到奉撥西征糧臺糧運的餉地丁銀一十萬兩以上二項共收浙江省協餉銀三百五十六萬二千二百三十一兩

奏稿卷五十五

美

一收江西省解到協餉銀二百零一萬兩

一收廣東省解到協餉銀一百七十萬零一千七百三十八兩又收廣東省解到奉撥西征糧臺糧運的餉釐金銀一十萬兩以上二項共收廣東省協餉銀一百八十萬一千七百三十八兩

一收湖北省解到協餉銀一百六十二萬三千五百五十二兩一錢二分三釐五毫五絲二忽一微又收湖北省解到奉撥西征糧臺糧運的餉地丁改撥釐金銀一萬九千三百零五兩零一分九釐二毫零五忽以上二項共收湖北省協餉銀一百六十四萬二千八百五十七兩一錢四分二釐八毫五絲七忽一微

一收江蘇省解到原協甘餉銀七十二萬兩又收江蘇省解到添

撥協餉銀三十七萬兩又收湖南督銷局解到江蘇省續增甘餉銀三十七萬兩又收江蘇省解到奉撥西征軍餉指提釐金銀二萬兩又收江蘇省解到協陝改撥西征軍餉銀二十一萬兩又收江蘇省解到原協穆圖善軍餉銀八萬兩以上六項共收江蘇省協餉銀一百七十七萬兩

一收安徽省解到協餉銀五十七萬五千兩又收安徽省解到奉撥西征糧臺糧運的餉地丁銀五萬兩以上二項共收安徽省協餉銀六十二萬五千兩

一收湖南省解到協餉銀六十七萬兩

一收福建省解到協餉銀八十四萬兩

奏稿卷五十五

七

一收山西省解到協餉銀六十五萬兩又收山西省解到奉撥西征糧臺糧運的餉地丁銀一十萬兩以上二項共收山西省協餉銀七十五萬兩

一收山西河東道解到癸酉綱鹽課撥協甘餉銀二十八萬兩甲戌綱鹽課協甘銀三十四萬兩乙亥綱鹽課協甘銀六萬兩三共收到銀六十八萬兩又收山西河東道解到專協雷正綰軍餉銀一十四萬兩以上二項共收山西河東道解到銀八十二萬兩

一收四川省解到協餉銀七十九萬兩又收四川省解到奉撥西征糧臺糧運的餉地丁銀五萬兩以上二項共收四川省協餉銀八十四萬兩

籌收山東省解到協餉銀四十六萬七千九百四十八兩八錢五分七釐

一收河南省解到協餉銀二十三萬零四十兩

一收江海關解到奉撥西征糧臺糧運的餉六成洋稅銀一十萬兩

一收粵海關解到同治十二年續撥西征軍餉六成洋稅銀七萬兩又收粵海關解到奉撥西征糧臺糧運的餉六成洋稅銀七萬兩以上二項共收粵海關解到銀一十四萬兩

一收閩海關解到專協雷正綰軍餉銀四十六萬兩又收閩海關解到奉撥西征糧臺糧運的餉六成洋稅銀一十萬兩以上二項

奏稿卷五十五

奏

共收閩海關解到銀五十六萬兩

一收江漢關解到奉撥西征糧臺糧運的餉六成洋稅銀二萬兩

一收兩淮運司解到奉撥西征糧臺糧運的餉鹽釐銀五萬兩

一收陝西藩司解到津貼雷正綰軍餉銀九萬五千兩

一收金陵軍需局解到協濟老湘營軍餉銀七十三萬八千二百

三兩二錢二分三釐四忽九微

一收陝西軍需局解到蜀軍提督徐占彪月餉銀二十九萬一千

七百七十三兩八錢八分又收陝西軍需局解到建威營降補參

將徐萬福月餉銀五萬三千二百五十兩以上二項共收陝西軍

需局解到銀三十四萬五千零二十三兩八錢八分

一收西征糧臺兼管甘捐總局解到總局續收甘捐銀一十萬九千四百六十五兩八分又收西征糧臺甘捐總局解到四川分局甘捐銀三萬八千一百六十八兩三錢六分又收西征糧臺甘捐總局解到山東濟南分局甘捐銀五萬九千八百九錢九分二釐又收西征糧臺甘捐總局解到山東濟甯分局甘捐銀二千七百六十三兩二錢又收西征糧臺甘捐總局解到山東登萊分局甘捐銀三千三百二十六兩八錢又收西征糧臺甘捐總局解到河南分局甘捐銀六萬二千七百八十五兩四錢四分又收西征糧臺甘捐總局解到江甯分局甘捐銀四萬二千二百八兩九錢又收西征糧臺甘捐總局解到秦州分局甘捐銀五百六十九兩二錢又收西征糧臺甘捐總局解到山西太原分局甘捐銀二百八十九兩六錢又收西征糧臺甘捐總局解到福建分局甘捐銀五十六兩以上十款共收西征糧臺甘捐總局解到甘捐銀三十一萬五百四十一兩五錢七分二釐

奏稿卷五十五

堯

一收西征糧臺甘捐總局解到江西捐輸局分撥甘省分成捐輸銀一萬二千七百四十一兩五錢一分三釐二毫

一收西征糧臺甘捐總局解到福建統捐局分成甘捐一半正項銀八萬八千二百零八兩九錢五分一釐二毫又收西征糧臺甘捐總局解到福建統捐局分成甘捐一半作抵欠餉銀八萬五千一百四十五兩五錢一分六釐八毫以上二項共收福建統捐局

分成甘捐銀一十七萬三千三百五十四兩四錢六分八釐

一收西征糧臺甘捐總局解到江蘇統捐局分成甘捐一半正項銀四萬八千四百五十兩七錢八分四毫四絲一忽又收西征糧臺甘捐總局解到江蘇統捐局分成甘捐一半作抵欠餉銀四萬四千八百一十一兩九錢二分三釐一毫八絲四忽以上二項共收江蘇統捐分成甘捐銀九萬三千二百六十二兩七錢三分六釐六毫二絲五忽

一收西征糧臺甘捐總局解到江甯統捐局分成甘捐一半正項銀二萬七千七百七十八兩六錢五分六釐三毫一絲二忽又收西征糧臺甘捐總局解到江甯統捐局分成甘捐一半作抵欠餉

奏稿卷五十五

李

銀二萬二千七百七十三兩九錢五分五釐六毫八絲八忽以上二項共收江甯統捐局分成甘捐銀五萬五百五十二兩六錢一分二釐

一收西征糧臺甘捐總局解到山東藩司代辦甘捐一半正項銀九萬一千兩又收西征糧臺甘捐總局解到山東藩司代辦甘捐一半作抵欠餉銀九萬一千兩以上二項共收山東藩司代辦甘捐銀一十八萬二千兩

一收西征糧臺甘捐總局解到山西藩司代辦甘捐一半正項銀六萬三千六百二十六兩四錢四分又收西征糧臺甘捐總局解到山西藩司代辦甘捐一半作抵欠餉銀六萬二千四百八十六

兩四錢四分以上二項共收山西藩司代辦甘捐銀一十二萬六千一百一十二兩八錢八分

一收西征糧臺甘捐總局解到河南藩司代辦甘捐一半正項銀六萬五千三百九十三兩八錢又收西征糧臺甘捐總局解到河南藩司代辦甘捐一半作抵欠餉銀六萬五千三百九十三兩八錢以上二項共收河南藩司代辦甘捐銀一十三萬零七百八十七兩六錢

一收甘肅各處稅釐局解到稅釐銀三十五萬七千九百六十九兩六錢二分七釐六毫四絲五忽七微

一收甘肅各鹽局解到鹽釐銀一萬一千三百七兩七錢一分八

釐二毫四絲三忽二微

奏稿卷五十五

空

一收甘肅藩司作解秦州等處地丁糧價等銀一萬二百一十五兩七錢四分三釐四毫

一收甘肅狄道州解到安插勇丁撥給地畝扣繳地價銀七千六百九十九兩

一收撥發全福福州副都統任內養廉項下扣收六分減平及裁減一成共銀四百七十兩六錢七分六釐八毫三絲查上項銀兩內扣收六分減平銀一百八十九兩三錢一分五釐八毫三絲又扣裁減一成銀二百八十一兩三錢六分一釐合符前數業經報明戶部歸於軍需項下作正列收理合登明

一收上海採運局道員胡光墉解到兩次挪借洋商軍餉銀八百萬兩查上項銀兩係光緒元年閒收到挪借洋款三百萬兩又三年間收到續借洋款銀五百萬兩合符前數理合登明

一收上海採運局道員胡光墉解到節次挪借華商軍餉銀一百萬兩

一收鄂臺解到節次挪借各商號軍餉銀一百五十五萬兩

一收駐陝軍需局解到節次挪借各款軍餉銀八十五萬兩

一收各軍營旂繳存陣亡病故弁勇口糧銀一十五萬九千九百五十二兩九錢五釐

一收各軍營旂報繳截曠銀一十四萬零七百一十六兩四錢三

分五釐二毫

奏稿卷五十五

奎

一收支放採辦製造各款共扣回平餘銀一十萬一千九百三十八兩一錢五分一釐九毫

以上四十三款共收銀三千四百八十四萬七千三百九十五兩七錢九釐九毫五忽九微連前次單開截至同治十三年十二月底止實存銀兩統共收存銀三千四百九十五萬六千五百五十八兩五錢八釐七毫四絲三忽七微內除由鄂徑行撥交穆圖善委員領解江蘇協餉銀八萬兩又轉解金順收用部撥景廉軍餉銀三十萬兩又撥發金順借支糧價銀七萬七千四百四十四兩三錢三分六釐八毫八絲二忽八微又撥交英翰軍餉銀九千六百八

十兩五錢三分二釐一毫一絲又撥交明春借支遣勇川資并軍餉銀三萬二千九百一十三兩八錢四分三釐一毫七絲五忽二微以上轉解五款均應由各該營自行報銷以清款目理合聲明又除解烏里雅蘇臺借用西征糧臺餘存駝價銀三萬二千七百八兩查前項銀兩經烏里雅蘇臺將軍大臣奏明由江西及兩淮在於欠解烏城協餉內解還歸款除收過外尙欠前數應俟撥還到日再行作正列收理合聲明

又除撥還過光緒元年間借用洋商銀三百萬兩款內第一二三四五等期共還過洋商本銀二百四十九萬五千兩查前項銀兩係由江蘇浙江廣東等省協餉項下按期劃還業於該省協餉項下列收茲經劃除其加給利息另歸支款項下開報請銷其餘未還本銀五十萬五千兩又未還光緒三年續借洋商本銀五百萬兩均歸四年以後撥還應歸次案開報理合聲明

奏稿卷五十五

三

又除撥還過節次由上海鄂陝等處挪借各款軍餉本銀五百一十八萬二千三百九十九兩二錢四毫一絲六忽一微查前項銀兩內係同治十三年分報銷單內開列未還挪借各款銀二百三十五萬三千一百九十兩二錢四毫一絲六忽一微又此案收款項下共計光緒元二三等年續由上海鄂陝等處挪借各款本銀三百四十萬兩二共挪借銀五百七十五萬三千一百九十兩二錢四毫一絲六忽一微內除撥還過前項銀兩外實尙未還銀五十

七萬八百兩應俟撥還後另歸次案開報理合登明

以上八款總共劃除銀八百二十一萬一百三十六兩九錢一分二釐五毫八絲四忽一微外實共收存銀二千六百七十四萬五千九百二十一兩五錢九分六釐一毫五絲九忽六微

一支發楚軍馬步各營旂幟各起護軍土勇各營汛制兵暨穆圖善雷正綰所部各軍自光緒元年正月初一日起至三年十二月底止共發過弁勇口糧銀一千四百六十五萬四千九十八兩五錢三分二釐九毫三絲七微查前項各營旂弁勇口糧自光緒元年正月初一日起至三年十二月底止共計應支銀一千五百四十七萬一百二十七兩八錢五分六釐八毫一絲七忽九微又欠

奏稿卷五十五

畜

發同治十三年以前餉銀八百四十五萬三千二百八十二兩一錢四分二毫五絲八忽一微二共應支餉銀二千三百九十二萬三千四百九兩九錢九分七釐七絲六忽內除裁撤歸併各營共註銷欠餉銀四百八十八萬七千三百九十四兩七錢五分二釐一毫七絲六忽六微儘數劃除不再補發又除發過前項銀兩外實尙欠發各營餉銀四百三十八萬一千九百一十六兩七錢一分一釐九毫六絲八忽七微應歸光緒四年以後再行陸續補發清款理合登明

一支發由上海及湖北陝西等處起解并由臣營撥解各軍餉銀糧米軍裝軍火等項需用船隻車駝夫騾腳價并匯解餉銀支給

匯費等項自光緒元年正月初一日起至三年十二月底止共銀六百四十五萬二千五百九十三兩五錢八分九釐八毫六絲九忽一微

一支發採買製造軍裝軍火旂幟號衣帳棚并洋槍洋礮子藥銅冒等項自光緒元年正月初一日起至三年十二月底止共工價銀一百三十三萬六千二百五十七兩六錢一分三釐五毫一絲

一支發採買軍糧米麩草料價值等銀除轉發各營扣回價銀外實計自光緒元年正月初一日起至三年十二月底止共津貼糧價銀一百五十四萬九千七百六十六兩八錢四分七釐二毫五絲六忽

奏稿卷五十五

奎

一支發隨營辦事文武及各臺局當差員弁薪水書役工匠護勇長夫口糧紙張油紅等項自光緒元年正月初一日起至三年十二月底止共銀五十萬一千一百五兩三錢八分九釐九毫八絲七微

一支發借用華洋各商號銀兩議給利息自光緒元年正月初一日起至三年十二月底止共銀九十五萬一千四百六十三兩七錢八分九釐查前項銀兩內共支給洋商利息銀六十三萬六千三百兩及滙鄂陝甘各臺局節次挪借各商號銀兩共支給利息銀三十二萬八百三十三兩七錢八分九釐合符前數理合登明

一支發各處屯墾經費採買耕牛籽種價值并漢回安插賑濟等

項自光緒元年正月初一日起至三年十二月底止共銀三十五萬四十八兩四錢二分二釐三毫六絲二忽

一支發採買馱騾車騾駝車輛鞍屨什物餵養等項價值自光緒元年正月初一日起至三年十二月底止共銀三十萬六千七百六十四兩五錢八分一釐二毫一忽

一支發各州縣津貼辦公并酌補文武各官歷任積欠薪廉及添設驛站修理各項經費自光緒元年正月初一日起至三年十二月底止共銀二十七萬七千九百五十二兩四分一釐九毫九絲七忽

一支發各營旂陣亡受傷弁勇卹賞養傷等項自光緒元年正月

奏稿卷五十五

奕

初一日起至三年十二月底止共銀七萬二千五百八十兩一錢三分四毫一絲八忽七微查前項卹賞養傷自光緒元年起至三年年底止各營續報打仗受傷陣亡弁勇共應支銀二萬八百二十八兩九錢九分八釐九毫五絲六忽九微及應補發前次單開截至同治十三年十二月底止欠發各營卹賞養傷銀三十六萬六千六十兩六錢七分二釐二毫二共應支銀三十八萬六千八百八十九兩六錢七分一釐一毫五絲六忽九微內除發過前項銀兩外實尚欠發銀三十一萬四千三百九兩五錢四分七毫三絲八忽二微應歸光緒四年以後再行補發再前敵各營於光緒元二三等年在關外南北兩路克復各城疊次打仗陣亡受傷弁

勇應得卹養均由各該統領先行酌量墊發尙未造冊請領應俟各該營造冊請領至日再行歸入次案造報請領以昭核實理合登明

以上十款通共支發銀二千六百四十五萬二千六百三十兩九錢三分八釐六毫二絲五忽二微除支實存銀二十九萬三千二百九十九兩六錢五分七釐五毫三絲四忽四微

通計截至光緒三年年底止實共欠發各營旂軍餉銀四百三十八萬一千九百一十六兩七錢一分一釐九毫六絲八忽七微實共欠發各營旂陣亡受傷弁勇卹賞養傷銀三十一萬四千三百九兩五錢四分七毫三絲八忽二微又欠還兩次挪借洋款銀五

奏稿卷五十五

卷

百五十萬五千兩又欠還鄂陝各臺局挪借各款銀五十七萬八百兩二共欠還借款銀六百零七萬五千八百兩

以上三款均應在於光緒四年以後收到餉銀款內陸續補發撥還另歸次案開報以清軫軻理合登明

軍機大臣奉

旨該部知道單併發欽此

同治十三年分軍需用款請 敕部照前單核銷片光緒五年十一月初八日
再同治十三年正月起截至年底關隴肅清止軍需收支款目前

經臣遵

旨開單懇請

敕部核銷於光緒五年四月十一日專差具奏嗣於六月二十一日差弁齎回原摺後開軍機大臣奉

旨該部知道單併發欽此旋准戶部咨開單開支發隨營辦事文武并臺局員弁薪水口糧等款查與該督上屆報銷案內每年支用銀數尙不甚懸殊惟支發採買軍糧米麪草料價值一款上屆報銷案內每年約支銀三十六萬餘兩此案共支銀九十一萬四

奏稿卷五十五

突

千餘兩較上屆多銀五十五萬餘兩又支發採買馱驟什物餵養等銀一款上屆報銷案內每年約支銀十一萬餘兩此案共支銀十八萬八千餘兩較上屆多銀七萬餘兩又支發各州縣津貼酌補各官薪廉等銀一款上屆報銷案內每年約支銀三萬四千餘兩此案共支銀三十一萬八千餘兩較上屆多銀二十八萬餘兩以上各款較上案一年所以多支數十萬鉅款之故應轉飭糧臺經管委員分晰開單咨部查核又補發各營弁勇口糧一百四十三萬三百六十二兩零亦未聲明補支何年何營欠餉均各轉飭查明聲覆報部等因到臣當飭辦理駐鄂陝甘後路糧臺道員王加敏辦理駐陝軍需局署陝西臬司陝安道沈應奎查明詳覆去

後茲據王加敏沈應奎詳稱遵查同治十三年關隴肅清大軍籌議出關凡軍糧料草馱騾什物等項不能不寬爲購備俾免臨時缺乏採辦之物件既多需用之款自自鉅此採買糧料等項用過價值較前加增之原委也至酌補各官薪廉等項較上屆報銷案內銀數增多一節遵查同治十二年以前報銷案內支發各州縣津貼辦公并酌補各前任積欠薪廉等項一款係專指酌發文職各官銀數而言其綠營武職員弁歷年積欠之項并未發給關隴肅清之後各營員弁兵丁紛紛具領不得不量爲酌發前次清單內開銀數係將文武各官及營汛制兵支領之項併計在內此次支發銀數均係隨時酌發并無一定額數此酌發文武各官積欠

奏稿卷五十五

堯

薪廉等項與上屆報銷案內未能一律之原委也又補發各營員勇口糧銀一百四十三萬三千六百六十二兩零亦未聲明補支何年何營欠項飭查聲覆一節遵查上屆報銷案內曾經聲明截至同治十二年年底止歷年積欠各營軍餉共銀八百二十五萬九千八百二十兩二錢二釐三毫二絲六忽此次補發銀內卽係欠發同治十二年以前截數開報欠餉八百二十五萬九千餘兩之內先行補發之項前單業將補發銀數在於欠發數內詳細聲明扣除且欠發各營軍餉均係遞年滾算亦無從按年分晰年分以上各節應請咨部仍照前單核銷等情具詳前來臣維軍需支款本與常年經費不同常年經費歲有定額部臣逐年比較按冊而稽

可以知其梗概軍需用款則不然如支發餉銀則視收款之盈絀定支發之多寡採製各物則視需用之緩急道途之通塞商販之多少價值之長落隨時採辦動用銀數非惟今歲不能比於舊數其需用緩急之間更有今日不能比於昨日者斷難齊之一律臣前次開報請銷各款不獨戶部得暨各節與上屆銀數間有不同臣即部臣所謂與上屆不甚懸殊之款亦無非與上屆報銷之數適相脗合其實按年支發銀數多寡本有異同亦非按年均勻攤算止有此數臣前次奏請核實開報不必牽合部章者正爲此也在部臣綜核支度查駁不厭精詳固爲慎重餉需起見惟臣受

恩深重值此時局艱難報銷各款若必俟部臣查駁然後飾詞聲

奏稿卷五十五

三

覆牽合請銷殊非臣實事求是之初心所有同治十三年分軍需用款應請

敕下部臣仍照臣前次單開銀數核銷以歸簡易其光緒元年正月起至三年回疆肅清日止用過各款銀數尤爲繁鉅已據王加敏沈應奎等開單具詳前來臣已另摺具奏應請

敕部一併查照核銷理合附片陳明伏乞

聖鑒訓示謹 奏

軍機大臣奉

旨該部知道片併發欽此

監禁阿古柏子孫片

光緒五年十一月二十三日

再臣承准總理各國事務衙門咨開光緒五年十月十五日奉

旨阿古柏之子孫四名應得罪名著改爲在甘肅省城牢固監禁

欽此等因咨行到臣仰見

聖慈廣霈法外施仁至意比卽恭錄行知甘肅臬司史念祖欽遵辦理立案以示久遠謹附片陳明伏乞

聖鑒謹 奏

軍機大臣奉

旨該衙門知道欽此

奏稿卷五十五

五

新疆蕩平出力員弁彙案請

獎摺

光緒五年十月十七日

奏爲新疆南北路一舉蕩平所有在事出力文武員弁欽遵疊奉
恩旨彙案保獎謹繕清單恭摺具陳仰祈

聖鑒事竊臣欽奉光緒二年八月十六日

上諭左宗棠奏攻克古牧地堅巢克復烏魯木齊迪化州各城詳
細情形辦理極爲得手其餘出力員弁勇著左宗棠彙案保獎
等因欽此北路肅清引兵南下連克達坂城托克遜堅巢會克吐
魯番光緒三年五月初十日欽奉

上諭左宗棠奏官軍會克吐魯番城詳細情形一摺張曜等迅赴
戎機勦辦得手其餘出力員弁勇著准其彙案保獎等因欽此
旋引軍而西拔喀喇沙爾庫車阿克蘇烏什克復東四城光緒三
年十一月二十一日內閣奉

奏稿卷五十五

三

上諭左宗棠奏官軍追勦逆回連復阿克蘇烏什兩城一摺此次
官軍整旅西征於冰霜凜冽彌望戈壁之中一月馳驟三千餘里
收復喀喇沙爾庫車阿克蘇烏什四城南疆已復其半諸將士踴
躍用命自應量予恩施等因欽此復引兵西南拔英吉沙爾分兵
南下葉爾羌徇和闐正兵徑趨喀什噶爾於是西四城又克光緒
四年二月十二日欽奉

上諭本日左宗棠金順劉典由六百里加緊紅旂奏捷克復南路
西四城回疆一律肅清一摺溯自同治三年布魯特叛首肇亂逆

回金相印等攻陷喀什噶爾蠶食南八城而吐魯番烏魯木齊等城相繼淪陷於今十有餘年朝廷恭行天討見在南八城一律收復兩宮

皇太后宵旰焦勞知人善任用能內外一心將士用命成此大功其餘出力文武員弁勇丁著左宗棠等查明彙案保獎等因欽此均經恭錄宣示行閒將士感奮歡呼舞蹈有口同聲疊據各統將按照各次戰績分案請保前來臣詳加覆核無異因伊犁尙稽收復懸案以待而歷時既久隨摺請獎者已拜

恩綸同時在事出力員弁兵勇待

澤方殷未敢稍存歧視陝回及安集延布魯特等敗餘各逆四次

奏稿卷五十五

三

犯邊均經掃滅出力之員弁兵勇查明分案保獎外謹先將蕩平新疆南北兩路出力員弁遵

旨彙爲一案開單請

獎以彰武節而策全功至陝甘轄境自潼關西抵哈密邊界袤延萬里臣自移節以來先靖關內以固封守嗣奉督辦新疆軍務

恩命移關內之軍經營關外而關內新復各郡縣番回雜處賊氛

甫斂民氣未蘇仍須畱駐重兵以資鎮撫臣於二年正月奏由蘭

州帶兵進駐肅州分遣諸軍出關卽駐肅州調度軍食仰賴

皇威遐邇前驅轉戰迅赴戎機而關內外各防軍在事員弁兵勇聯絡銜接行者居者同役同心用是克不待乎三年師無煩乎再

駕各防軍復於暇時平治道路開濬河渠助墾民田廣植官樹城
堡驛舍橋道河梁凡民力所不逮者皆防軍任之自涇原以西至
於嘉峪回番安戢伏莽潛銷自關外至於新疆丈田平賦開渠行
水百廢肇興纏民樂業耕牧各安其所有時征戍更番士氣常新
樂事赴功爭先恐後則防軍之前勞不可沒而後效固可期也據
統領精選等營陝西提臣雷正綰甘肅提臣周達武統領卓勝軍
記名提督金運昌統領蜀軍記名提督徐占彪統領安遠軍記名
提督易開俊統領後路各營記名提督河州鎮總兵沈玉遂統領
恪毅等營署甯夏鎮總兵馮南斌統領楚軍中路各營記名提督
借補甘肅鎮海協副將周紹濂統領武威軍平慶涇固道魏光燾

奏稿卷五十五

著

開單請獎前來臣與幫辦甘肅新疆善後事宜臣楊昌濬就劉典
開存擬保清冊逐一覆核合軍務防務護運工作敘次年勞彙請
獎敘大軍出關已四載矣關內外各軍有勞足錄者甚多茲僅就
其勞績最著人才可用者加以甄錄然擬保之實職虛銜亦未敢
過優也至新疆征戰多由北路進兵糧臺隨營安設回疆有警則
兵由烏魯木齊進糧臺設於哈密或肅州調餉於附近各省調馳
於蒙古調軍馳於陝甘承平無事時物產豐盈猶虞不繼此次大
軍由關內進發先平北路乃引軍南下創從前未有之奇兵驟頻
年人畜彫耗除設局歸化包頭採買糧料陸運五千餘里至巴里
坤存儲接運外餘皆由涼甘肅採糧層遞灌運車馱驟馳用價購

雇其承辦採運之印委員弁弊混延遲者一經覺察必與嚴懲其
敏幹勤慎者固不能不予之獎勵也甘肅瘠苦甲於天下自設省
以來歲需經費及新疆經費皆由戶部預撥指撥每歲以四百數
十萬兩計臣入關度隴後兵事日急需餉浩繁因各省關協餉不
繼不得不息借洋行及華商之款於是飭上海採運局收集借款
并催閩浙粵東協款運解鄂臺鄂臺集各省關之餉運襄樊水陸
設局運西征糧臺隨時運解蘭州由蘭運肅由肅分運新疆各軍
各局護運責之防軍押運委之員弁幸少延誤其樸實耐勞者固
不能不予以獎勵也又直隸承解京餉四川河南山東徑解協餉
均由西征糧臺回銷所委員弁亦宜酌予獎勵謹另具一摺開單

奏稿卷五十五

差

請

旨其各省關將軍督撫監督臣不分畛域力顧西陲實本公忠至

誼臣原不敢代乞

恩施然感幸佩慰之忱實有耿耿於懷不能自己者謹於另摺陳
明請

旨除藍翎千總以下各弁照例咨部註冊外是否有當伏乞

皇太后

皇上聖鑒訓示施行謹 奏

光緒六年正月三十日內閣奉

上諭左宗棠奏蕩平新疆南北兩路在事出力員弁彙案保獎開

單呈覽一摺光緒三年至四年官軍由古牧地進剿攻克烏魯木齊吐魯番等城復將南路八城次第克復在事員弁或衝鋒前敵或防護後路均屬著有微勞自應量予鼓勵所有單開各員弁均著照所保官階分別獎勵該部知道欽此

奏稿卷五十五

美

各省關籌解協餉各員併案請

獎摺

光緒五年十月十七日

奏爲各省關籌解協餉爲數較多各項差使人員出力已久謹併案請

獎恭繕清單仰祈

聖鑒事竊甘肅新疆軍餉全資各省關協濟承平無事時戶部預撥指撥之款通計四百數十萬兩臣入關度隴復督辦新疆軍務所有餉需一切靡不仰給外省戶部承

旨籌撥各省關隨時批解危局賴以支持

臣

於光緒二年正月因

關隴肅清彙案開單具奏爲時又已四載茲值新疆南北兩路一舉蕩平疆圻海關諸臣督同司道局員籌解接濟以顧急需於時

奏稿卷五十五

七

局實有裨益其公忠體

國不存纖細計較之私尋常畛域之見於古義實有符合竊維東南芻粟西北甲兵本皆

國計所關以公家之財濟公家之用雖挹注因其時緩急權其可而究無彼此之可言惟人情各顧其私無論舍己芸人本爲不情之舉卽先人後己亦未免強以所難未可爲例惟在當局者斟酌損益出之在本省無憂竭蹶在西陲得濟要需是以飽行者壺飧之惠拯貧者枵腹之危其於天理人情乃爲無歉矧

諭旨森嚴部文諄切固可深閉固拒巧詞諉卸自蹈愆尤乎就各省關言之如前江西撫臣劉秉璋見任江西撫臣李文敏均由藩

司升任巡撫其於西征軍餉協解最多前浙江藩司升任湖南巡撫臣衛榮光到浙後卽毅然以西餉爲重迅籌起解前浙江撫臣

梅啟照安徽撫臣裕祿任內協解西征軍餉不待咨催前湖南撫

臣邵亨豫協解新餉外更解還舊欠且省陝甘應分還廣西之款

一萬兩解濟西征雖爲數無幾足彰公道見署甘肅藩司前浙江

撫臣楊昌濬自同治六年浙藩任內至光緒三年交卸撫篆止共

解西征實餉數踰千萬兩較各省尤多督理閩海關稅務福州將

軍臣慶春督理粵海關稅務記名副都統俊啟解濟西餉不遺餘

力在該臣等同值時艱盡心籌措無非體

國之誠微臣得所藉手亦何敢以感幸私情上瀆

奏稿卷五十五

奏

天聽顧耿耿寸衷實有未能暫釋者應否仰懇

恩施將劉秉璋李文敏衛榮光梅啟照裕祿邵亨豫楊昌濬慶春

俊啟諸臣均

賞加頭品頂帶李文敏俊啟并

賞給正一品封典以示優異伏候

聖裁至閩浙督臣何璟調任兩江督臣劉坤一四川督臣丁寶楨

於西陲兵事餉事極肯畱心應懇

天恩交部從優議敘其籌餉最爲出力各員及差使出力各員謹

另繕清單恭呈

御覽伏懇

聖慈免其分別註考

恩准獎敘以示鼓勵伏乞

皇太后

皇上聖鑒訓示施行謹 奏

光緒六年正月二十六日內閣奉

上諭左宗棠奏各省關籌解協餉各員併案請獎開單呈覽一摺
新疆南北兩路軍務救平各省關歷年以來籌濟協餉不遺餘力
自應量加甄敘前江西巡撫劉秉璋江西巡撫李文敏前湖南巡
撫衛榮光前浙江巡撫梅啟照安徽巡撫裕祿禮部左侍郎前湖
南巡撫邵亨豫署甘肅布政使楊昌濬前福州將軍慶春粵海關

奏稿卷五十五

五

監督俊啟均著賞加頭品頂帶李文敏俊啟并賞給正一品封典
閩浙總督何璟兩江總督劉坤一署四川總督丁寶楨均著交部
從優議敘其餘單開出力各員弁等所請獎敘著該部議奏單併
發欽此

蔭生楊宗瑞請以同知分發陝西補用片

光緒五年十月十七日

再已故廣東布政使楊慶麟任內籌解西餉最爲盡力每次書來具陳洋務邊情言多可採未丁憂之前猶有書來備陳粵東餉源漸濬如可爲力當悉心籌解以濟要需臣鑒其誠一詳復一函旋聞其以母喪解官計復函猶在途中未得寓目楊慶麟性情敦摯事親稱孝在官在籍人無間言及其歿也粵人哀之臣雖未與謀面乃心惓惓敬仰維殷茲當彙案保獎不獲列敘前勞常爲耿耿聞其子三品蔭生楊宗瑞志趣甚正冀其有所成就應請以同知分發陝西補用臣亦得就近訓課俾畢其繾綣私衷實爲幸甚是否可行伏乞

奏稿卷五十五

聖鑒訓示施行謹 奏

軍機大臣奉

旨著照所請該部知道欽此

革員祝應燾懇

恩註銷永不敘用并

賞給原銜頂帶片

光緒五年

十二月十七日

再已革鹽提舉銜湖北崇陽縣知縣祝應燾前在崇陽縣任內因

民爭樹一案辦理不善幾致激成事端經湖廣督臣奏參革職示

不敘用嗣經該督撫臣查明事屬因公尙無藉端詐索情事會同

咨部結案臣因新疆南路地本宜桑上年飭各局查明冊報實有

八十餘萬株之多但纏回不知接桑養蠶之法惟收甚以代糗糧

間有飼蠶取絲者絲硬色闇較中土遠遜天生美利人自棄之良

爲可惜查祝應燾籍隸浙江於蠶桑諸務最爲諳悉當經札調來

甘訪聞屬實卽飭赴浙招募接桑養蠶繅絲織作各工匠來甘以

奏稿卷五十五

三

便派撥出關轉相教習見據報已募各工匠六十名隨帶器具抵

蘭州一俟到肅飭令出關合無仰懇

天恩俯念該員從前獲咎事屬因公尙無貪酷私罪准其先行註

銷永不敘用并

賞給原銜頂帶畱營差遣庶便發赴新疆各處教習接桑養蠶蠶

繅繅絲諸法俾邊方則效以厚民生謹附片具陳伏乞

聖鑒施行謹 奏

軍機大臣奉

旨著照所請該部知道欽此

